

ANG KASAL SA CORDERO



Salamat, Igsoong Edmonds. Ang Ginoo magapanalangin kanimo.

Maayong gabii, mga higala. Siguradong usa ka pribilihiyo ang makaanhi pag-usab niining gabhiona sa Fellowship Tabernacle. Sa pag-agi ko, kaganinang hapon, ug ginalantaw-lantaw ko kung dinhi na ba gyud, ug nakita ko ang pulong “Fellowship,” eksakto gyud mismo sa ako. Gusto ko kana, Igsoong Edmonds. Fellowship, kana mao ang gitoohan nato.

² Usa ka suod ko nga higala, nga nagtaliwan na pauli aron makauban sa Ginoo, daghan kaninyo siguro ang nakaila kaniya, si Dr. F. F. Bosworth. Daghan kaninyo. Nakaanhi siya kaniadto sa Phoenix, sa pagkahinumdom ko, kauban ko siya usa ka higayon, maisog nga tawo. Ug usa siya kaniadto. . . usa ka—usa ka. . . Usa ka tigulang nga lalaki nga balaan kaayo. Apan magpatawa usahay. Ug miingon siya kanako, usa ka higayon, miingon siya. . . kanunay ko man gud nalakbitan ang bahin sa fellowship. Ug miingon siya, “Igsoong Branham, kabalo ka ba kung unsa ang fellowship?”

Miingon ko, “Bueno, siguro oo, Igsoong Bosworth.”

³ Miingon siya, “Duha ka fellow sa sulod sa usa ka ship.” Aba, ug husto pud, magkauban sa usa ka barko.

⁴ Ug nakita ko nga daghan kaninyo ang nagpataas sa inyong mga kamot, nga nakaila kang Igsoong Bosworth. Ingon nga—nga nakaila mo kaniya, gusto kong mag-estorya og gamay mahitungod sa katapusan niyang mga oras nga ania pa sa yuta. Dugay-dugay ko na pud siya nga kaila. Ug dinhi na siya kaniadto nga nagwali sa Maayong Balita ug nagaampo alang sa mga masakiton, nga wala pa ako natawo. Busa nakita n’yo kung unsa na ang iyang katigulangan. Gihatagan siya sa Ginoo, sa hunahuna ko, mga otsentay-singko ka tuig, mga ingon niana, ug sa gihapon usa ka maisog nga tigulang nga tawo bisan niadtong mitaliwan na siya.

⁵ Niadtong mga setentay-singko siya, mga ingon niadto ang iyang edad, siya ug ako atua niadtong. . . sa pagtoo ko, sa Edgemont Hotel sa Miami. Ug human na kami nangaon niadto sa among—among panihapon, ug nagbaklay-baklay kami didto sa baybayon kung diin nagapanghaplos kadtong mga balud, didto mi aron sud-ongon ang pagtungha sa bulan. Ug didto ako, mga kuwarenta na ang panuigon, luyloy na ang mga abaga, nagalakaw nga ingon niadto. Ug siya, nga mga setentay-singko na, tul-id pa sa gihapon ang barug. Ug gitan-aw ko siya, ug belib gyud ko kaniya. Ug miingon ko, “Igsoong Bosworth, gusto kong mangutana kanimo.”

Miingon siya, “Sige unsa man, Igsoong Branham.”

Ug ingon ko, “Unsang edad ka nga maingon mong anaa ka gyud sa kabaskog?”

⁶ Miingon siya, “Karon mismo.” Bueno, niadtong tungora, nagbati ko og kaulaw sa akong kaugalingon. Ug ingon pa niya, “Nalimtan mo na siguro nga usa ako ka bata, nga nagapuyo sa usa ra ka tigulang nga puy-anan,” ang giingon niya. Ug ingon niana gayud si Igsoong Bosworth.

⁷ Niadtong nahibaloan ko nga pataliwan na siya aron makigkita sa atong Ginoo, halos mapudpod ang mga ligid sa akong sakyanan, niadtong mibiyahe ko paingon sa Miami, aron makita siya. Ug pag-abot ko ug sa akong asawa didto. . . Suod gayud nga magkahigala ang pamilyang Bosworth ug ang among pamilya. Ug misulod na kami. Nagahigda sa usa ka gamay’ng sofa ang tigulang nga patriyarka. Ug gipataas niya, ang gamay niyang upaw’ng ulo, ang medyo, nanghagpis niyang mga bukton gitulon niya kanako, nga sama *niana*. Mitulo ang mga luha sa akong aping. Dalidali kong gigunitan ang iyang mga bukton, ug mihilak ako, “Amahan ko, amahan ko, ang mga carro sa Israel ug ang mga magkakabayo niini!” Tungod, kung aduna ma’y tigulang nga tawo nga naghatag og dignidad sa buluhatong Pentecostal, si Igsoong Bosworth kana. Siya gayud. Usa siya ka bililhong bulak.

⁸ Ug kabalo mo, ang unang butang nga gusto niyang buhaton niadtong tungora, maoy estoryahan ako og makahimuot nga sugilanon, sama niadtong, kabalo na mo.

Ug miingon ko, “Igsoong Bosworth, moarang-arang pa kaha ang kahimtang mo?”

⁹ Miingon siya, “Aba, Igsoong Branham. Wala man ko’y sakit, sa tinuod lang.” Ingon pa niya, “Mopauli na man gud ko.”

Ingon ko, “Bueno, maayo kung ingon-ana.”

¹⁰ Gikan lang namo niadto sa natad sa pagmisyon sa Africa, siya ug ako. Miingon siya, “Tigulang na ako kaayo aron mabuhi pa og dugay.” Ingon pa niya, “Mopauli na ako.”

Ingon ko, “Igsoong Bosworth, unsa man ang maitambag mo kanako nga angay kong buhaton?”

¹¹ Ug miingon siya, “Magpabilin ka sa Ebanghelyo.” Ug ingon pa niya, “Balik ka sa natad sa pagmisyon sa gilayon kutob sa mahimo mo.” Miingon, “Kana ang maitambag ko.”

¹² Ug ingon ko, “Igsoong Bosworth, usa pa ka butang ang gusto kong ipangutana unta kanimo.”

Miingon siya, “Unsa man kana, Igsoong Branham?”

¹³ Ingon ko, “Karon, halos saysenta na ka tuig nga gigahin mo alang sa Ginoo, sa pagministeryo, o tingali subra pa.” Ug ingon

ko, “Kanus-a man nga maingon mo nga labing malipayon nga higayon sa kinabuhi mo?”

Miingon siya, “Karon mismo.”

Ug ingon ko, “Igsoong Bosworth, nasayod ka man siguro nga duol ka nang mamatay?”

¹⁴ Miingon siya, “Dili ako puede mamatay. Namatay na ako daghang katuigan na ang milabay.” Ug miingon ako . . . Miingon siya, “Igsoong Branham, tanan nga akong gimahal ug gihatagan og dakung bili sa nangaging saysenta ka tuig, ginapaabot kong ablihan na Niya kana nga pultahan sa unsa mang oras ug moanhi na, aron kuhaon na ako.”

Nahinumdom hinoon ako niadtong, *Ang Salmo Sa Kinabuhi*.

Ang kinabuhi sa bantugang mga tawo
nagapahinumdom kanato
Nga ang atong kinabuhi mamahimong
ikinabuhing pagkahalangdon,
Tungod sa ilang pagtaliwan, nga kanato gibilin
Ang ilang mga-agi-sa-tiil diha sa mga balas sa
panahon.

Ug nagbilin gayud siya og iyang mga-agi-sa-tiil, alang kanako.

¹⁵ Sa wala pa siya namatay, o mita- . . . wala pa siya miadto sa Himaya, mga usa ka oras, o tingali sobra pa, sa wala pa siya nga mitaliwan. Medyo nahinanok pa siya sulod sa pipila ka oras; ug ang iyang asawa, mga anak nga lalaki, mga minahal sa kinabuhi atua didto, ug nahigmata ang maong lalaking tigulang, mitan-aw siya sa palibot, mibangon, ug midagan, ug nakiglamano sa iyang inahan nga mipanaw na sa daghang katuigan, kauban ang iyang amahan. Ug sulod sa halos usa ka oras niadto, nakiglamano siya sa maong mga tawo, nagaingon, “Kini si Igsoong John. Oo, miduol ka niadto kang Cristo sa akong panagtigum, didto sa Joliet, Illinois. Ania si Igsoong . . .” Nagapakiglamano sa iyang mga kinabig nga mga mitaliwan na, sa dugay nang mga katuigan.

¹⁶ Akong—sultihan ko kamo, nagatoo ako nga sa oras nga motabok na kita gikan sa niining kalibutan paingon ngadto sa pikas kinabuhi, nagatoo ako nga nianang higayona diin . . . Mamahimong malisud tabokon ang suba, malisud gayud, kabalo na mo. Nagatoo ako nga tingali nagaingon ang Ginoo ngadto sa atong mga minahal sa kinabuhi, “Pag-adto kamo sa suba ug tagboa sila didto.” Sama sa giingon ni Jacob, pagatipunon kita uban sa atong katawhan sa umalabot nga adlaw.

¹⁷ Ginapaabot ko usab ang pag-abot nianang adlaw. Ug kung mahuman na ako sa niining kinabuhia dinhi, o human na ang Dios kanako dinhi, ug makita ko nga nalabang ko na ang matag

kuta nga mabuntog ko, nalabang na ang matag sapinit, ug nasaka na ang matag bungtod, gusto kong lingion, ug tan-awon kung asa ko naggikan, sa pag-abot ko didto sa suba.

¹⁸ Kanunay ko ginaingon kini, sama sa atong itum nga mga igsoon dinhi, aduna sila og mubong kanta nga ilang ginakanta, “Dili ko gusto magka-problema sa pag-abot ko didto sa suba.” Gusto kong itul-id ang mga angay itul-id sa karon pa lang.

¹⁹ Tingali kinahanglan ko ibalik ang espada sa sakuban niini, ug puhason ang helmet, ug ibutang kini sa baybayon, ug ipataas ang akong mga kamot, ug mosinggit, “Ipadala Mo na ang barkong-igluluwas, Amahan. Papauli na ako niining buntaga.” Siguradong moanha Siya. Ayaw’g kabalaka. Nagatoo ako niana. Nagatoo ko mao kana ang pangandoy sa matag usa sa atong mga kasingkasing.

²⁰ Karon, usa ka gayud ka dakung prebilihiyo ang makaanhi karong gabhiona uban sa hiligugmaon nga pastor dinhi ug sa iyang iglesia, ug sa niining maanindot nga buluhaton, ug sa mga lumalangyaw kang Cristo, dinhi sa halayong dapit sa Phoenix. Tugod, sa tinuod gayud, kita’y mga lumalangyaw lamang. Mga magpapanaw lamang kita ug mga estranghero dinhi. Nagapangita kita og usa ka Siyudad.

²¹ Sama sa ginahisgotan ko kaganinang buntag sa tabernakulo ni Igsoong Fuller, mahitungod sa Harianong Binhi. Karon, kung adunay mga teyp rekorder kamo, wala ko pa kini nasulti. Apan adunay nahitabo kaganinang buntag, nga akong . . . Kung aduna mo’y teyp rekorder, kung makakuha kamo og kopya sa mga teyp, sigurado ko nga magustohan ninyo kini. Aduna niini si Igsoong Maguire, ug kini *Ang Harianong Binhi Ni Abraham*.

²² Kita n’yo, si Isaac ang binhi ni Abraham, nga usa ka Judio, sa natural. Apan ang Harianong Binhi mao si Cristo, pinaagi sa saad, ug ang kanang Cristo mao ang Pulong sa Dios nga nadayag. Ug sa sulod sa atong kasingkasing karon samtang atong . . . “Kung akong . . . Kung kamo magapabilin Kanako, ug ang Akong Pulong magapabilin kaninyo, kung ingon-ana managpangayo kamo nga buot ninyo, ug kini pagabuhaton kaninyo.”

²³ Karon, nahisgotan ko kana, dinhi sa Phoenix, sa daghang higayon na sa akong pabalik-balik dinhi . . . Ang unang higayon nga nakaanhi ako mga trayntay-singko ka tuig na pud ang milabay. Ug didto sa 16th ug Henshaw, didto ako nagpuyo, nagtrabaho ako sa Circle R Ranch, didto sa Wickenburg. Ug miadto ako didto uban sa akong anak nga babaye sa 16th ug Henshaw. Nag-adto ako didto aron pangitaon ang maong lugar niadtong miaging adlaw, ug dili na diay Henshaw ang ngalan niini karon. Buckeye na kini sa karon. Ug usa na kini ka dakung siyudad sa mismong sentro sa Phoenix. Nabag-o na tanan.

24 Ug nag-adto ako ug ang akong asawa sa South Mountain, aron lantawon gikan didto ang Phoenix. Nahunahuna ko, mga tulo ka gatus na ka tuig ang milabay, wala siguro og unsa man dinhi kondili mga lobo, cactus, ug mga ingon lang niana. Ug karon usa na kini ka dakung makahibulong nga siyudad. Karon, ingon ko, “Honey, nabag-o ba o nabalit-ad? Ikaw na ang magsulti. Kay alang kanako, nabalit-ad na kini karon. Tungod nga, ang mga dagkung bilding ug maanindot nga mga gambalay maayo pud unta kung ang mga kalalaken-an ug mga kababayan-an nga nagalakaw-lakaw sa kadalanan niini, uban sa ilang mga kamot nga nakataas ngadto sa Dios, nagadayeg sa Dios, ug nagkinabuhi nga sama sa magsoon nga mga lalaki ug mga babaye; kaysa ang paghuboghubog, pagsugalsugal, pagpanigarilyo, pagpamakak, pagpangawat, pag-adto sa mga balay-inuman, tanang dautan nga mga butang. Apan taliwala sa niining tanan, bisan nga . . .”

Dayon miingon ang akong asawa kanako, “Kung ingon-ana, Billy, para sa unsa pa man nga mianhi ka?”

25 Ingon ko, “Pero, honey, sukad nga milingkod kita dinhi, kinse minutos pa lang, pili na kaha ka mga pagpamakak ang nasulti dinha nianang walog? Pila na kaha ka tunglo ang ginapanumpa-an, nga gamit pa ang Ngalan sa Ginoo sa walay kapuslanan? Pila na kaha ka daghan ang sigarilyo, pila na kaha ka daghan ang ilimnong makahubog, pila na kaha ka mga pagpanapaw ang nahimo, ug ang tanan niana didto, sulod sa pila ra minuto, nga ania ta dinhi?”

Miingon siya, “Dili ba pagkangil-ad niana?”

26 Apan miingon ko, “Ania ang kung unsay hinungdan nga ania ta, honey. Pila na kaha ka matinud-anon nga mga pag-ampo ang naipangamuyo ngadto sa itaas sugod niadtong ania na ta dinhi? ‘Kamo ang Kahayag sa kalibutan.’ Mao kana ang hinungdan kung nganong ania ta, aron maisangon nato sa atong mga abaga uban sa mga gagmay’ng mga iglesia dinhi, himoon ang tanang mahimo nato, aron matabangan kini nga maipadayon. Aron mahimong usa ka . . .”

27 Kamong tanan, nga mga balaan, maoy panalangin kanako. Nagalaum ako nga mamahimo akong panalangin usab kaninyo, sa pagbisita ko dinhi. Ug ako, niadtong nahibaloan ko nga makabisita ako sa nagkalainlaing mga denominasyon ug mga organisasyon, ug—ug sa nagkalainlaing mga iglesia, ug sa uban pa, sa mga kaigsoonan sa tibook walog dinhi sa Phoenix, tugob sa kalipay ang akong kasingkasing. Kana’y sa dili pa ang konbensyon kon diin ako nadapit sa pagwali, didto sa konbensyon sa Christian Business Men, siguro, sa Sabado sa buntag sa pamahaw, ug dayon sa tigum sa Dominggo sa hapon, nga mosunod na, sa sunod Dominggo niana. Ug usa gayud ka prebilihioy kanako nga kanunay kong makita kini

nga mga kaigsoonan. Siguro anaa sa mga baynte-singko ka gatus ang mahimo nilang palingkuron didto. Daghan kaayo og lingkuranan para kanatong tanan. Ug naglaum kami nga magkita-kita kita didto.

²⁸ Ug dayon ang magkaaduna og higayon nga makapag-fellowship ako sa mga kaigsoonan, ug makabisita sa nagkalainlaing iglesia, ug magwali. Siguro nagmadasigon ako sa wali ko kaganinang buntag hangtud napaus ko sa pagwali, sulod sa mga usa ka oras ug tunga. Ug mubo lang kadto. Kasagaran dili ako moubos sa tulo o upat ka oras sa pagwali, didto sa—sa iglesia namo didto. Ako nga . . . Dili ako usa ka magwawali. Busa ginapaagi ko—ko na lang sa pagpatugbaw sa akong tingog nga malipayon ngadto sa Ginoo. Ganahan gyud ko og ayo nga buhaton kana. Ako—gusto ko lang siguro ang ingon-ana, busa kana ang ginabuhat ko kanunay. Usahay upat o lima ka higayon nga akong ginabuhat kana, napalangan ko og ayo ang mga tawo, busa nasayod ako nga matuod kana. Ug karong gabhiona, sa tinuod, basin ala una na ta makapamauli. Akong, halos siguradohon ko kana kaninyo. Kung puede, lang unta . . . Pagkamaanindot man gud sa espiritu sa palibot, ug ang tanan maayo kaayo, nasigurado ko nga adunay nakaandam sa ato nga panalangin ang Balaang Espiritu.

²⁹ Karon, wala ako nakapahigayon og mga panerbisyo sa pagpang-ayo sa karon sa mga panagtigum. Ako . . . Usa ka gabii, didto kang igsoong . . . didto ako sa Jesus' Name, unsa gani ang ngalan niadtong pastor? Igsoong Outlaw. Sa simbahan ni Igsoong Outlaw, daghan kaayo didto nga gustong maiampo. Ug gisultihan ko ang akong anak nga manghatag og mga prayer card. Ug sulod sa duha ka gabii, bug-os nga gibubo ang Balaang Espiritu sa bilding, hangtud . . . Nasayod na kamong tanan. Nakatambong na kamo sa mga panagtigum ko. Nakatambong na kamong tanan. Nakita na ninyo ang paglihok sa pagpang-ila, ug uban pa. Apan namatikdan ko karon nga midaghan ang angay nga maiampo na. Ug namatikdan ko daan, sugod niadtong Miyerkules ug Huwebes. Nahunahunaan ko nga maghulat na lang ko hangtud pagkahuman sa Domingo, tungod nga kung magpahigayon ka og mga panerbisyo sa pagpang-ayo sa simbahan . . .

³⁰ Nakita n'yo, akong—kanunay nako gipahibalo sa tanan bisan asa ako moadto nga ang matag usa motuman sa ilang katungdanan kung asa sila kinahanglan kada Domingo, nakita n'yo. Ang mga espesyal nga panagtigum sama niini gipahigayon aron mabisita lamang ang mga kaigsoonan. Ug tinguha namo—namong magpabilin ang tanan kung asa ang ilang katungdanan, kay ginahulat kamo didto sa inyong pastor, ug kinahanglan nga atua kamo didto.

³¹ Busa nga—nga nahunahuna ko, ugma sa gabii, kon itugot sa Ginoo, dili ako . . . Asa ba kita ugma sa gabii? [Nagaingon

ang usa ka igsoong lalaki, “Didto sa Tempe, sa simbahan ni Igsoong O’Donnell.”—Ed.] Kang Igsoong O’Donnel, didto sa Tempe, Arizona. Karon, kung wala man kamo og unsa mang— unsa mang espesyal nga buluhaton sa inyong simbahan, ug aduna kamo og masakitong mga tawo, sige, magampo ako alang sa mga masakiton, ugma sa gabii, usa ra ka kasagarang linya sa pagpaampo, mag-ampo alang sa mga masakiton, tingali— tingali sa Lunes na, Martes. Tan-awon nato, siguro . . . akong . . . Oh, aduna ako’y . . . May bisitahon ba ako nga simbahan sa Miyerkules sa gabii? [Oo.] Miyerkules sa gabii. Kung ingon- ana . . .

³² Ug magsugod na kana sa Huwebes, sakto ba, ang konbensyon? [Nagaingon ang igsoong lalaki, “Ania man siguro sa ako ang . . . ? . . . konbensyon.”—Ed.] Sige, igsoon. Aduna siya og pagpahibalo karon. [“Kita n’yo, ania kami karong gabhiona. Ug ugma sa gabii anaa na pud kami didto sa Tempe Assembly of God. Ug dayon didto sa Mountain View sa Sunnyslope sa ika-baynte-tres. Ug dayon didto pud sa Central Assembly sa ika-baynte-kuwatro.] Sige, maayo kana. [“Dili ko madumduman, kung sakto ba. Medyo nalibog ko.”] Ayaw na hunahunaa kana.

Niadtong usa ka adlaw nahisgotan ko kana, ang bahin sa, “Dili ko madumduman.”

³³ Ug miingon kanako si Igsoong Jack Moore, miingon, “Sa hunahunaa mo ingon na niana ka kagrabe?” ingon niya.

³⁴ Ingon ko, “Igsoong Jack, pagmosulti ko, dili na nako mahinumdom kung unsay akong ginahisgotan.”

³⁵ Miingon siya, “Ayaw hunahunaa nga grabe na kana.” Miingon, “Ako gani nga nanawag sa telepono, ako mismo ang nanawag, ako pa’y moingon, ‘Unsa man ang imong tuyo?’” Bueno, mas grabe na kana! . . . ? . . . Oh!

³⁶ Busa, aba, mora ba og pagpakatawa kana, nga sa hunahunaa ko dili husto isulti dinhi sa pulpito. Apan ang mga anak sa Dios mga malipayon gayud nga mga anak, bisan pa man, kabalo na mo, busa kita—ingon niana kita usahay. Sa hunahunaa ko medyo makapahimuut kana.

³⁷ Kamo dinhi, daghan kaninyo, ang nakaila kang Igsoong Jack Moore. Siya taga-Shreveport, Louisiana, Life Tabernacle, maayo kaayo nga igsoon. Ug mao nga gisulti niya kana kanako. Usa siya ka kontraktor, pud.

³⁸ Miingon siya, “Ayaw hunahunaa nga mas grabe ka na, Igsoong Branham.” Miingon, “Aduna ako’y gitawagan niadtong usa ka adlaw, ug gitawagan ko ang numero nila.” Ug ming-ingon, “Gitubag nila, nag-ingon, ‘Hello.’ Ingon ko, ‘Bueno, unsa man ang imong tuyo?’”

Nahunahunaa ko, “Bueno, mas grabe na gyud na, Igsoong Jack.”

39 Busa karon, sa hunahuna ko mas maayo, nga ang mga higala nato dinhi nga gustong maiampo, dalhon lang nila ang ilang masakiton nga mga kongregasyon, dayon ato silang iampo.

40 Karon, niining gabhiona, ginapamalandong ko kaganina kung unsa ang iwali ko karong gabhiona sa niining hiligugmaon nga iglesia. Nahunahuna ko, “Bueno, wala ako kahibalo kung unsa.” Mokuha na lang ko dinhi og usa ka hamubong teksto, ug isalig sa Ginoo ang paghan-ay sa mga pulong kung asa man angay iplatar kini, ug tugotan nga maipuwesto kini sa husto niining posisyon nga diin mamahimong tabang kang kinsa man. Aron nga . . . Dili ko basta-basta na lang mopili og usa ka teksto. Kanunay kong mabati usá ang pagpanguna, ug isulat ang maong pipila ka mga Kasulatan, ug uban pa. Ug—ug dayon, kung mag-lahi sa direksyon ang pagpanguna sa Ginoo, nan mosunod lamang ako sa pagpanguna Niya. Ug sa hunahuna ko nga kinahanglan ingon niana ang atong buhaton. Di ba? Ingon niana usab ang atong buhaton.

41 Ug karon adunay usa ka butang nga—nga akong—akong gustong hangyoon, ginapahibalo kini sa matag lokal nga iglesia. Ug kini ang, kung mahimo . . . Pag naiampo n’yo na ang inyong pastor ug ang inyong mga mahal sa kinabuhi, ayaw ninyo ako kalimti, tungod naamgo ko, nga sa kada adlaw, labi na sa karon, papaduol na kita sa katapusan sa atong panaw.

42 Ug bag-ohay lang gilubong ang akong inahan, pipila pa lang ka semana ang milabay. Ug gisapnay ko siya sa akong mga kamot hangtud nga gikuha na sa Dios ang iyang gininhawa ug ang iyang kalag padulong sa Langit. Nabantayan ko ang maisugon nga pagkamatay sa usa ka babayeng puno sa Espiritu Santo, ug nakita ko siyang miabot didto sa kinatumyan iyang panaw. Nahunahuna ko, “Oh, gitinguha ko—ko nga ang matag inahan mamahimong sama niya. Kinahanglan aduna gyud ko’y buhaton aron . . . buhaton ko ang kutob sa akong mahimo, aron maipakita sa mga tawo kung unsa ka mahinungdanon kini.”

43 Ug, mga higala, nagatoo ko nga mas halalum pa kini kay sa atong gidahum. Ug sa hunahuna ko ginabasta-basta lang nato kini kaysa kung unsa kini ka mahinungdanon para sa ato. Siguro kinahanglan natong hinumduman. Kung ang Dios ingon ka balaan kaayo nga bisan ang mga Anghel mahugaw sa Iyang atubangan, unsa pa kaha kita? Kita n’yo? Husto kana. Busa kinahanglan natong hinumduman kana. Ug hinumduman nato, ang Dios anaa sa Eternidad, nga mas labaw pa ka mahayag sa tanang mga adlaw sa sistemang solar. “Balaan, balaan, balaan,” ingon sa mga Anghel nga ginatabonan nila sa ilang pako ang ilang nawong, ug usab ang ilang mga tiil, nagalupad diha sa Iyang Presensya, nga nagatuaw, “Balaan.” Unsa pa kaha kita? Busa atong . . . Ginapaninguhaan nato kana nga buhaton.

44 Ug—ug ang tan-aw ko nga, ang Ginghamarian sa Dios, sama sa usa ka lalaki nga mikuha og usa ka pukot ug nag-adto sa dagat, sa giingon ni Jesus, ug gisapyaw kini. Ug sa dihang gibira na niya, sagolsagol ang iyang nabaling. Apan ang maayong isda, siyempre, gireserba; ug ang dili-kinahanglang mga isda gipangbalik ngadto sa tubig, sama niining lambay, ug—ug mga bitin, mga tabili, mga bao, ug uban pa. Apan ginapukot sa mga pukot sa Maayong Balita ang tanan niini. Ug atong. . . Moabot ang adlaw sa umalabot nga panahon nga igataktak nato ang pang-katapusan na natong pukot, Igsoong Adams. Husto kana. Dili ikaw o ako ang makasulti kung asa niana ang isda o kung asa ang dili. Wala kita masayod. Basta ginataktak lang nato ang pukot ug ginabira. Kana lang. Ang Dios ang nakaila sa mga Iya. “Kinsay Iyang giila-nang-daan, Iyang gitawag; ug sila nga Iyang gitawag, Iyang gimatarung; ug kinsa kadtong Iyang gimatarung, Iyang gihimaya.” Mao nga nagapaabot lang kita, ginataktak lang nato ang pukot. Ug usa ka prebilihio sa ako ang makabarug sa simbahan ni Igsoong Edmonds niining gabhiona aron makatabang sa pagtaktak sa pukot sa niining lugara, aron makita kung aduna ba’y isda ang Dios dinhi para sa Iyang Ginghamarian.

45 Karon, sa dili pa nato basahon ang Pulong, makig-estorya usá kita sa Tagsulat Niini samtang nga ginaduko nato ang atong mga ulo.

46 Samtang nakaduko ang atong mga ulo, diha sa pagkabalaan niining higayona, ingon nga nagaduol kita sa Pulong sa buhing Dios, nga mao ang Dios, akong gihunahuna kon aduna kaha’y mga tawong may mga hangyo diha sa ilang mga kasingkasing, nga gusto nilang hinumduman sa niining pag-ampo. Ipahibalo kini pinaagi sa pagpataas sa inyong kamot.

Ginoong Jesus, lantawa ang mga mananambong, hingsayran Mo ang sulod sa matag kasingkasing.

Salamat.

47 Labing maloloy-on ug balaan nga Dios, ang Makagagahum, El Shaddai, nga nagpakita kaniadto kang Abraham sa Ngalan nga “ang Makagagahum, ang madughanong-Dios, ang Tighatag-og-kusog, ang Maglilig-on sa mga mahuyang,” umari Ka kanamo karong gabhiona, Amahan. Ug ingon nga nasayod kami sa among kaluyahon ug sa among mga kasaypanan. Ginapahayag namo ang among mga kasal-anan sa Imong atubangan, ug ginapahimutang kini diha sa Imong tumbagang halaran sa paghukom, ug ginapangamuyo nga tangtangan kini sa Dugo ni Jesus Cristo, sa ginahimo namong paghalad niini. Itugot kini, Oh Dios.

48 Ginatugyan namo ang among mga kinabuhi ug ang tanan nga aduna kanamo, ug bisan ang gamay’ng talento nga

gikahatag kanamo. Ginoo, gamita kini alang sa kahimayaan sa Dios.

⁴⁹ Panalanginan Mo kini nga iglesia, ang hiligugmaong pastor niini, mga diyakono, mga tinugyanan, ug ang tanang anaa sa hunta niini, ug ang matag miyembro nga nagasimba sa niining iglesia nga ginatawag nga “Fellowship.” Dios, ginaampo ko ang mga kalalaken-an ug mga kababayan-an, nga sa pagsulod nila sa pultahan niining lugara, mabati unta nila ang ilang kamasalaypon tungod sa pagkamaanindot nga kahan-ayan sa Balaang Espiritu sa sulod niining bilding. Itugot kini, Ginoo.

⁵⁰ Pasayloa ang among mga sala, ug ang among mga kalapasan, amo kining ginahangyo pag-usab. Hinumdumi ang mga nagpataas sa ilang mga kamot. Ubos sa nianang kamot, Ginoo, usa ka kasingkasing nga nagahangyo og usa ka butang gikan Kanimong, ug mahimong Ikaw lamang ang bugtong makahatag niini. Nagaampo ako nga ihatag Mo kini, Amahan. Unsa man ang gikinahanglan nila, igahatag Mo kanila diha sa kadagaya. Kung aduna ma’y mga masakiton, Ginoo, ayohon Mo sila. Kon aduna ma’y nahidagma diha sa daplin-sa-dalan, lig-onon Mo siya, ang tuhod niyang nagmaluya. “Sa usa ka nabasag nga bagakay, dili Siya mobali, o ni ang usa ka nagapid-ok nga pabulo dili Siya mopalong.” Ug nahibaloan namo nga dili gayud Niya pasagdan ang nabasag nga bagakay; Iya kining ibalik sa husto. Ug nagaampo ako, Langitnong Amahan, kon aduna ma’y mga espiritu nga nagmasulob-on, o—o nawad-an og kadasig, o nangaluyang mga kamot, ug namingho’yng mga tuhod, hinaut nga mangadasig sila karong gabhiona, Ginoo. Hinaut nga mokunsad ang Balaang Espiritu ug ayohon ang among mga kasingkasing ug mga espiritu, ug ang among mga pisikal nga lawas, ug igahatag namo Kaniya ang tanang mga pagdayeg tungod niini. Ginapangamuyo namo kini sa Ngalan ni Jesus. Amen

⁵¹ Kung gusto ninyong ablihan ang Kasulatan, para sa mga traynta minutos lang nga wali, gusto kong ubanan ninyo ako sa pagbasa dinhi sa libro sa Pinadayag, sa ika-19 nga kapitulo. Ug buut kong basahon paubos hangtud sa ika-7 nga bersekulo, kining tanan.

Sa human niining mga butanga nadungog ko ang daw sa makusog nga tingog sa usa ka dakung panon didto sa langit, nga nanag-ingon, Aleluya; Ang kaluwasan, . . . himaya, ug ang kagahum, iya sa Ginoo nga atong Dios:

Kay ang iyang paghukom maoy mga matuod ug mga matarung: kay gihukman niya ang dakung bigaon, nga mao ang nakapadunot sa yuta pinaagi sa iyang mga pakighilawas, ug gipanimaslan gyud niya ang dugo sa iyang mga ulipon diha sa mga kamot sa bigaon.

Ug nanagpamulong sila sa ikaduha, Aleluya. Ug ang iyang aso nagautbo hangtud sa kahangturan.

Ug mihapa ang kaluhaan ug upat ka mga anciano ug ang upat ka mga buhing binuhat ug nanagsimba sa Dios nga nagalingkod sa trono, nga nanag-ingon, Amen; Aleluya.

Ug gikan sa trono miabut ang usa ka tingog, nga nagaingon, Dayega ninyo ang atong Dios, tanan kamo nga iyang mga ulipon, ug kamo nga may kahadlok kaniya, mga gagmay ug mga dagku.

Ug nadungog ko ang tingog ingon sa usa ka dakung panon, ug ingon sa hinaganas sa daghanang mga tubig, ug ingon sa tingog sa makusog nga nagadalugdug, nga nagaingon, Aleluya: kay naghari ang atong Ginoong Dios nga Makagagahum sa tanan.

Managkalipay kita ug managhugyaw, ug igahatag ta kaniya ang himaya: kay ang kasal sa Cordero nahiabut na, ug ang iyang asawa nagaandam na sa iyang kaugalingon.

⁵² Buut kong hisgotan karong gabhiona bahin sa hilisgotan nga: *Ang Kasal Sa Cordero*, sa pipila lang ka mga minuto aron... Nasayod na kita sa niining Kasulatan. Walay pagduhaduha nga nahisgotan na kini sa inyong hiligugmaon nga pastor sa makadaghan nang higayon.

⁵³ Ug, mao nga, nahibaloan nato nga magkaaduna gayud og usa ka Pangasaw-onon, ug magkaaduna og usa ka pangkasal nga panihapon nga ipahigayon sa kalangitan. Sigurado gayud nga mahitabo kana, ingon ka sigurado nga adunay Dios, tungod kay kini ang Iyang Pulong. Ug nahibaloan nato nga kadtong mga mamahimong Pangasaw-onon mao ang Iyang Iglesia, ug magaatubang sila ngadto Kaniya nga walay buling o kunot. Ug aduna kanila karon ang kasangkapan sa yuta aron iandam ang ilang mga kaugalingon. Kung mamatikdan ninyo, giingon Niini, “Siya nagaandam na sa iyang kaugalingon.”

⁵⁴ Daghan kaayo nanag-ingon, “Kung tangtangon sa Ginoo ang dautang espiritu nga ania kanako, sa pag-inum-inum, o sa pagsugal-sugal, o sa pagpamakak, o sa pagpangawat, mangalagad gyud ako Kaniya.”

⁵⁵ Apan depende na kana kanimo. Kita n’yo, kinahanglan aduna pud ka og buhaton, man lang. “Ang mga magmadaugon makapanunod sa tanang mga butang.” Ang mga magmadaugon. Aduna kamo og kagahum nga mahimo ninyo kini, apan kinahanglan nga andam pud kamong isurender kini tanan. Kita n’yo? “Siya nagaandam na sa Iyang kaugalingon.” Gusto ko kanang Pulonga.

⁵⁶ Nakita n'yo, dili kita mahimong isuksok sa Dios sa usa ka piut nga tubo, dayon birahon kita diha sa pikas tumoy, ug dayon ingnon, "Bulahan ang nagmadaugon." Nga wala ka man lang og unsa mang gipakiglimbasogan; giagi ka man lang Niya palusot hangtud sa pikas tumoy. Pero gikinahanglan niini ang imong pagdesisyon. Kinahanglan ko usab nga magdesisyon para sa akong kaugalingon. Sa pagbuhat niana, ginapakita nato ang atong pagtoo ug pagrespeto sa Dios.

⁵⁷ Gikasaaran kaniadto og usa ka anak si Abraham, pero gikinahanglan niya nga magpabilin sa niining saad sulod sa baynte-singko ka tuig, bisan pa sa tanang pakigbisog nga naagian niya, uban sa mga pagsulay, sulod niadtong baynte-singko ka tuig. Luyo nianang tanan nagpabilin siya sa saad nga pulong.

⁵⁸ Ug gikasaaran kaniadto og usa ka yutang saad ang Israel, apan gikinahanglan nilang makigbugno alang sa matag pulgada niini. "Matag tunob sa lapalapa sa imong tiil, gikahatag Ko na kaninyo," ang ingon sa Dios kang Josue. Atua kini tanan didto. Atua didto ang maong kayutaan, ug gihatag na kini sa Dios kanila, apan gikinahanglan nila nga makigbugno para niini.

⁵⁹ Mao usab kini sa Balaanong pagpang-ayo. Ang Dios aduna og gahum aron ayohon kamo, kung aduna lang mo'y kaisog nga dawaton kini, apan gikinahanglan nga makigbugno kamo sa matag pulgada ninyong matunoban.

⁶⁰ Aduna ang Dios og kahibulongang grasya aron luwason ka, ug buhaton gayud Niya kini, pero kinahanglan nga makigbugno gayud kamo sa matag pulgada nga inyong matumban.

⁶¹ Dugay na akong nagawali sa pulpito, magtrayntay-uno anyos na, ug matag pulgada niana kanunay gayud nga pagpakigbugno, nga walay hunong. Ingon niana gayud.

⁶² "Apan gikinahanglan natong makigbugno kung magahari kita." Mao nga nahibaloan nato nga gikinahanglan gyud iandam sa Pangasaw-onon ang Iyang Kaugalingon. "Andam nga isalikway ang tanan nga kabug-at nga sa dakung kasayon nagapiit paglikos kanato, aron nga mahimo natong dalaganon nga mapailubon ang lumba nga gitanyag sa atong atubangan." Kinahanglan gayud natong isalikway ang mga niini, kita mismo. Dili nato puedeng ingnon, "Dios, umari Ka, isalikway Mo ang mga niini para kanamo." Kinahanglan nga kita ang mobuhat niana, nga buhaton nato mismo.

⁶³ Karon, gusto kong pamalandungon ang bahin sa kasal. Nagkaaduna ako kaniadto og pribilihiyo nga magkasal og pipila ka mga tawo. Ug sa hunahuna ko, sa dihang ginapaadto na nako ang usa ka batan-ong lalaki ug batan-ong babaye ngadto sa altar, ug ginatan-aw sila nga nagalakaw diha sa taliwala sa simbahan; ug ang pangasaw-onon, nga maanyag tan-awon diha sa iyang bisti pangkasal, ug natabunan sa belo

ang iyang dagway ug nakalaylay paubos; ug ang pamanhonon usab, nakatindog, maanindot ang gisul-ob; ug anaa sa iyang kabatan-on ug buhong sa kalagsik, samtang nagalakaw sila diha sa adlaw sa ilang kabaskog, ug manumpa sa sinumpaan nga kaminyoon, sa hunahuna ko aduna gyuy pagkamaanindot nga butang bahin niana. May sa kung unsang sagrado, nga maoy nagapahinumdom kanako nga magkaaduna og usa na usab ka halangdon nga kasal sa umalabot nga adlaw, sa diha nga ang Pangasaw-onon ni Cristo magalakaw na didto sa dalan sa Kahimayaan.

⁶⁴ Giandam na sa Pamanhonon ang tanan-tanan pagmoabot kana. Magkaaduna og usa ka pagkasal ug usa ka panihapon. Pagkatahum palandungon nga manglingkod kita nga nag-atubangay ang usa'g usa diha sa lamesa, ug maglamanohay, ug ang mga luha magadagayday sa atong mga aping. Ug dayon, moabut Siya, pagapahiran ang mga luha gikan sa atong mga mata, nga nagaingon, "Ayaw na kamo paghilak. Tapos na ang tanan. Sumulod kamo sa kalipayan sa Ginoo nga nahilandam na sa inyo sukad pa sa pagkatukod sa kalibutan." Oh, igsoon, mas painiton pa niana ang pag-minahalay nato sa usa'g usa.

⁶⁵ Sa hunahuna ko mao kana kung unsa ang nagakahitabo sa Iglesia, ang Pangasaw-onon sa karon nga panahon, nga mao'y naglangkub niining tanang mga iglesiang nagatoo kang Cristo. Dili nga ang gambalay kon asa gihimo ang simbahan, ni ang organisasyon o ang denominasyon, kondili ang mga indibiduwal nga anaa sulod sa iglesia ang naglangkub sa maong Pangasaw-onon.

⁶⁶ Aduna ko og buutan nga higala didto sa Louisville, Kentucky, si Dr. Wallace Cauble, nga usa ka ministro sa Church of Christ, ug midangop ug gidawat ang Espiritu Santo, ug nag-pastor sa usa sa mga inilang, pinakadakung mga iglesia sa Louisville, ang church of the Open Door. Usa siya ka bililhon kong higala. Ug pipila ka adlaw ang milabay, nagtindog ako niadto sa dalan, ug nakita ko siya nga nagalakaw didto sa dalan. Ug gimahal ko siya kaniadto pa, ug mao pud siya kanako.

⁶⁷ Apan usa niadto ka adlaw gioperahan siya sa tonsil, ug grabeng dugo ang migawas kaniya nga hapit na siyang mamatay. Ug gidala nila siya sa Saint Joseph Hospital, ug ingon nila nga mamatay na siya. Ug gitawagan ako ni Mrs. McSpadden, miingon, "si Dr. Wallace Cauble." Dili ko pa siya kaila kaniadto, pero nahibalo ko nga adunay dakung church of the Open Door. Miingon, "Naghimalatyon na siya. Giindyeksiyonan na siya sa mga doktor, tanan na nga mga pagsalbar. Gitahi na nila. Padayon gihapon ang pagdugoay niya, ug dili nila mapugngan ang dugo. Dili motigpok ang pagdugo niya, ug, kabalo na mo, kinahanglan nga mapatigpok na kadtong pagdugoay." Ug miingon, "Dunay mga misyonero sila nga atua didto, ug gusto ka nilang paadtoon, aron imo siyang iampo."

68 Bueno, may nadungog na ako bahin kang Dr. Wallace Cauble, ug mao nga medyo nagpanagan-on ako, pero miadto gihapon ko. Ug paglantaw ko didto sa sulod sa lawak sa ospital, may mga misyonero ug inilang mga ministro, atua didto tanan, nanaghilak ug nanag-ampo. Ug nahunahuna ko, “Hala, ka! Unsa man lang ako, nga usa ka yanong holy-roller, ang mosulod didto? Mas maayo pa siguro nga dinhi na lang ko sa gawas.” Mao nga nagluhod nalang ako didto sa luyo sa maong Coke machine sa agianan. Nag-ampo ako sa Dios, nga—nga matigpok ang pagdugo, ni Igsoong Cauble. Human sa akong pagluhod didto ug mipauli na dayon ako.

69 Bag-ohay lang ako miabot sa balay niadto, mga kinse minutos, ug may tawag sa telepono pag-usab, ug gusto nilang hibaloong kung ngano nga nalangan man ako, og wala pa ako miadto didto. Ug miingon ako, “Ako—nag-anha na ako. Pero daghan na man gud ang atua sa sulod. Akong—gibati ko man nga dili na ako kinahanglanon sa sulod, siguro, kita n’yo, daghan na, man gud ang atua sa sulod nga mga inila nga mga ministro.”

70 Dayon miingon kini, “Pag-anhi dayon karon.” Miingon pa, “Dili na siya mabuhi pa og dugay.”

71 Mao nga mibalik ako, pag-usab. Ug sa pag-abot ko didto, saktong may babayeng Katoliko nga iyang ginapadawat kang Cristo ingon nga personal nga Manluluwas; ug nagdugoay pa gyud siya niadto, ug may gapanglagsik nga dugo gikan sa iyang baba. Misulod ako.

Ug miingon siya, “Kumusta ka?”

72 Ug miingon ko, “Kumusta ka man?” Nagalingkod siya sa higdaanan, ug nagaubo nga sama niadto, ug ang dugo gapanggawas.

Ug miingon siya, “Unsay imong ngalan?”

Ug miingon ko, “Ako si Igsoong Branham.”

73 Ug nakahilak siya, og gigakus niya ako. Miluhod ako didto.

74 Karon, si Dr. Wallace Cauble kadto, sa church of the Open Door sa Louisville. Puede ninyo siyang pangutan-on pinaagi sa sulat. “Miundang ang pagdugo niadtong mismong sigundo.” Wala na kadto nagdugo, sugod niadto. Kita n’yo? Ug kami hilabihan gayud, nga suod kaayo nga higala sukad niadto. Ug niadtong usa ka adlaw, natagbu ko siya. Ug ang giingon niya . . .

75 Si Oswald J. Smith, daghan sa inyo ang nakaila na kang Igsoong Smith. Usa siya ka inilang misyonero, ug nagaduaw-duaw siya kang Igsoong Cauble, tungod nga ganahan gayud siya niining igsoona. Miingon siya, “Igsoong Cauble, kabalo ka ba,” ingon niya, “Ako . . .” Bahin kadto sa iyang asawa. Miingon siya, “Niadtong bag-o pa lang ako gikasal,” ingon pa, “Gibati ko nga, bueno, basin og nasayop ako, akong, oh, puede pa man ako magminyo og utro,” kay batan-on pa siya niadto. “Pero,”

miingon, “pagkahuman nga miabot na kanamo ang mga bata,” ingon pa, “mora og malisud na kung mawala siya sa ako. Dayon pag mag-singkwenta anyos ka na, dili na gyud mahimo kung wala siya. Ug samtang nagakatigulang ka, aba, ingon—ingon niana gyud ang bation mo.”

Ingon ko, “Siguro husto gyud kana.” Akong . . .

⁷⁶ Kung sa unsa nga miabot kami niadtong hilisgutan, kabalo mo may sa kung unsang gawi nga hanas ang mga babaye bahin sa pagpamilya, ug lakip na niana ang akong asawa. Ug siya mao ang rayna pagbahin na nianang tanan. Grabe kadugay gayud niya. Hastang halos na ako mosurender sa kasakit sa tiil, sa paglibot-libot sa dalan kauban niya. Ug giingon sa ako sa maong igsoon, miingon, “Buena, siguro dili mo gyud mahimo kung wala siya.” Ug dinha midangat ang among pag-estoryahanay.

⁷⁷ Pag-uli ko, napalingkod ako didto sa sulod, naghunahuna, “Husto gyud diay kana.” Gigamit ko ang kadtong panghunahuna sa ubang konteksto.

⁷⁸ Kabalo mo, niadtong bag-o pa lang ako sa . . . human nga nahimo akong usa ka magwawali sa Missionary Baptist, sa pagdahum ko, “Kung dili ma-Baptist ang usa ka tawo, dili gayud siya maluwas. Mao gyud kana.” Ug samtang sipitsipit ko ang Biblia, nagdahum ko nga tinawag ako sa Ginoo para himoong Baptist ang tanang tawo. “Ug ang tanan nga dili motoo sama sa pagtoo sa mga Baptist, aba dili gyud sila mahiapil.”

⁷⁹ Sa paglabay sa mga adlaw, nagdahum ko nga sa ako lang nakasangon ang tanan nianang buluhaton, buhaton kini nga nag-inusara. Ug sa ulahi nasayran ko, namatikdan ko ang usa ka igsoon nga aduna og simbahan, usa ka pastor. Nagpakabudlay usab siya, nga sama kanako. Sa pagkatinuud, napailalum pud siya taklap nianang katungdanan, kabalo na mo.

⁸⁰ Pagkahuman nahibaloan namo, gikinahanglan namo ang usa’g usa. Ug karon, sukad nga nagkatimbayayong kami sa dugay nang panahon, mora og malisud nang molihok nga wala ang usa’g usa. Kana lang. Gikinahanglan nga magtimbayayong gyud ang usa’g usa, nga ingon niana. Ug nagatoo ko niana para sa niining pangdagkung buluhatong pentecostal. Malipayon akong makita nga kanang mga babag sa pagkawalay-pagpakabana sa usa’g usa nangalumpag na, nga nagsugod nang nagkahiusa diha sa pagpakig-fellowship ang halangdong Iglesia sa Dios. Nagkahulogan kana nga duol na gyud moabot ang maong pagkasal. Ug ang mga bato, lainlain man ang ilang pagkaputol sa usa’g usa, aduna sila og bahin sa nianang bilding, kung sila’y mga bato sa Ginoo.

⁸¹ Karon, ang kasal, sa ubang bahin, usa kini ka tipo. Ang kasal dinhi sa yuta usa ka tipo sa langitnong kasal. Hisgotan nato kini karon, sa pila ka minuto, atong hisgotan kini sa pipila ka minuto.

⁸² Ang pinaka-unang butang gyud sa tanan, kinahanglan aduna og pagdesisyon. Ang pinaka-unang butang, kinahanglan, sa natural nga kasal, mao gayud ang pagdesisyon. Kinahanglan magdesisyon gyud ang dalaga, kung gusto ba gayud niya ang kining batan-on; ug ang batan-ong lalaki pud, kung gusto ba gayud niya ang dalaga. Kinahanglan adunay pagdesisyon, ug kinahanglan ninyo buhaton ang pagdesisyon. Kinahanglan siya lamang ang babaye sa kalibutan ang imong higugmaon, ug kinahanglan nga siya lamang nga lalaki usab. Kung dili gani, nan nasayop ka sa pagdesisyon.

⁸³ Ug ingon niana pud kini sa pagdesisyon alang kang Cristo. Ang unang butang nga kinahanglan nimong buhaton, maoy pagdesisyon kung alagaran mo ang Dios ug dawaton Siya ingon nga imong Manluluwas, o dili mo na lang kana buhaton. Ang kalibutan ba ang imong alagaran? O si Cristo ba ang imong alagaran? Kinahanglan nga bug-os gayud ang imong pagdesisyon. Kinahanglan aduna gyuy pagdesisyon. Kung sigurado na ang desisyon mo, nga kung sa Dios o ang bahandi ba ang imong alagaran, ayha na ka magpili. Apan kinahanglan gyud ang pagdesisyon.

⁸⁴ Ug dayon, human sa imong desisyon, kung unsa man kana, ayha dayon pagsulod sa saad-sa-pagminyo. Nga, dalhon mo gyud sa altar. Kinahanglan nimong mosulod sa saad-sa-pagminyo sa dili pa ka magkaaduna og pagkausa. Ug ingon niana pud kini sa Iglesia nga iya ni Cristo. Kinahanglan gayud nga anaay pagsaad-sa-pagminyo kang Cristo, usa—usa ka pagpasalig, usa ka pagsaad-sa-pagminyo, usa ka relasyon sa paghigugmaay.

⁸⁵ Ug dayon, ang sunod, maoy—mao ang pagsaad. Kinahanglan magsaad sa usa'g usa, sama sa paghimo mo og saad. “Mahal, kung pakaslan mo ako, isaad ko nga magmaunungon ug tinuod ako. Dili na ako mangita pa og ubang babaye.” O, “Dili na ako mangita pa og ubang lalaki. Ug buhaton ko kini tanan ingon nga katungdanan, ingon nga asawa. Pag—aduna na kita’y mga anak, buhaton ko ang tanan katungdanan sa usa—usa ka inahan. Ako, ako mamahimong usa ka maayong tig—atiman sa balay.” Kinahanglan gyud nga buhaton kini nga mga pagsaad, o kinahanglan nga ibungat, sa usa ka tukmang kasal.

⁸⁶ Ug ingon niana pud sa inyong pagduol kang Cristo. “Ginoo, kung dawaton Mo ako sa Imong Ginghamarian, isaad ko gayud.” Mao gyud kana. “Higugmaon ko Ikaw. Magmatinud—anon ako Kanimo. Alagaron ko Ikaw, adlaw ug gabii.” Masubo lang hunahunaon nga nalimtan na nato kana. “Alagaron ko Ikaw, adlaw ug gabii. Magpuasa ako. Mag—ampo. Magmaunungon nganha Kanimo. Dalhon ko ang akong mga ikapulo sa balay—tipiganan. Ako, ako—magaampo ako, sa daghang higayon sa matag adlaw. Akong—buhaton ko ang unsa man. Ug isaad ko ang tanan kong gugma nganha Kanimo.” Ingon niana gyud ang ang

kinahanglan n'yong buhaton. Eksakto gayud kana, kung kang kinsa ninyo isaad kana, ug gikinahanglan nga nagsumikad kini sa inyong kasingkasing.

⁸⁷ Kung nagsaad ka niana sa imong bana, ug dili nagsumikad sa imong kasingkasing, nga dili tinuod kanimo, bug-os gyud nga dili husto ang pagpuyo mo uban kaniya. Daw sa pakitang-tawo lang nga relasyon.

⁸⁸ Tan-awa ninyo kini. Kung—kung wala ka'y ngipon, ug migamit ka na lang og pustiso, karon, walay problema niana. Gipulihan mo lang ngipon nga aduna ka kaniadto. Apan, sa tinuod lang, kana nga ngipon wala nakakonekta kanimo. Dili kini kabahin nimo. Kung ang—ang kamot mo naputol, ug magpataud ka og dili tinuod nga kamot, bueno, kana nga kamot dili konektado kanimo. Gipatapat lang kana kanimo. Kita n'yo? Dili gyud kini konektado kanimo.

⁸⁹ Ug kung manumpa kita kang Cristo, nga dili kita nahimong kabahin Niya, sama ang usa ka babaye nga nahimong kabahin sa usa ka lalaki ug ang usa ka lalaki nahimong kabahin sa usa ka babaye, kung ingon-ana artipisyal kita nga mga Cristohanon. Dili kita, mga tinuod gayud. Dili ka pa gyud naminyo sa nianang babaye. Mahimong matinud-anon ka kaniya. Pero kung dili mo gyud tinuod gimahal ang imong bana, ug siya saysenta o setenta anyos na ang panuigon, ug dili mo siya gihigugma nga sama niadtong gihigugma mo siya sa sinugdanan, nan gipadaku mo lang diay ang iyang mga anak.

⁹⁰ Ingon gayud niana ang mga kaiglesiahan, ang kadaghanan kanila sa karon. Nakatapat lang kanato ang ngalan nga “Iglesiang Cristiyano,” nagpakaaron-ingnon nga Pangasaw-onon. Ingon nga, artipisyal lang diay. Dili kita konektado kang Cristo bisan unsaon. Sama lang kita sa usa ka ngipon nga artipisyal, kamot nga artipisyal, mata nga artipisyal. Kita n'yo? Butang kini nga artipisyal lang kung nakapatapat lang kini kanato. Bueno, dili mo mahimong ipatapat lang ang pagka-Cristohanon. Kinahanglan nga konektado ka niini.

⁹¹ Ug mao nga sa usa ka iglesia nga usa lang ka artipisyal, nahinganlan lang nga iglesia ni Cristo, bueno, ang mga anak nga anaa sulod niini wala pa nakasulod Didto, sila nga gipakatawo sa mao rang organisasyon. Usa lamang. . . Dili sila mga anak ni Cristo. Mga anak sila sa denominasyon, ug dili mga anak ni Cristo.

⁹² Kung dili konektado ang babaye sa lalaki sa bug-os nga pagkatinuod, kung ingon niana dili niya kini bana. Usa lang siya ka lalaki nga iyang gikapanumpaang kaubanon sa kinabuhi, ug sayop ang iyang pagpanumpa. Nanumpa siya nga higugmaon ang maong lalaki, ug giingon niya nga gihigugma niya kono kini, pero dili diay. Sa sinugdanan pa lang, nalimbongan ang lalaki.

⁹³ Apan adunay usa ka butang nga sigurado gyud, mga higala, dili gayud nato malimbongan si Cristo. Nakaila Siya sa mismong mga Iya.

⁹⁴ Apan, kita n'yo, una, aduna gyu'y pagdesisyon. Ang sunod, ang saad-sa-pagminyo. Dayon, ang saad na mismo.

⁹⁵ Ug, dayon, ang seremonyas. Ug sa nianang punto kuhaon na sa pangasaw-onon—sa pangasaw-onon ang apelyedo sa pamanhonon. Dili na niya daladala ang mismo niyang apelyedo. Dala na niya ang apelyedo sa pamanhonon.

⁹⁶ Ug pagnabuhat na sa iglesia ang seremonya, nabungat na ang ilang mga saad, ayha niya dalhon ang Apelyedo sa Pamanhonon. Kung ingon niana dili na siya iglesia sa kalibutan. Iglesia na siya ni Ginoong Jesus Cristo. Amen. Dili . . . dili ko buut ipasabut, nga, sa Apelyedo. Ang buut kong ipasabut, nga, pinaagi sa Pagkapanganak pag-usab, pinaagi sa bag-o nang kinaiyahan, pinaagi og gahum sa Dios. Pinaagi sa naipadayag nga Kamatuuran nga iya sa Dios, diha sa kasingkasing, usa na siya karon ka Iglesiang Cristohanon, ang halangdong pang-tibuok kalibutan nga apostolikanhong Iglesiang Cristohanon. Nahimo siyang kabahin ni Cristo. Pagnahitabo kana kaniya, iyang . . . ginapasulod ni Cristo ngadto sa Iglesia ang Iya mismong Espiritu, ang Iya mismong Kinabuhi. Ug giingon sa Biblia, kang Adan ug kang Iba, kaniadto, “Dili na kamo duha, kondili usa na.” Ug kung ang babaye, ang Iglesia, gikasal na ngadto kang Cristo, dili na sila duha pa. Usa na sila. Si Cristo na ang sa sulod ninyo! Amen. Kana lang. Ang Kinabuhi Niya ginabutang na sa sulod ninyo, mao nga kamo nahimo nang Pangasaw-onon.

⁹⁷ Dayon, usa pa ka butang, pagkahuman nga nahimo na niya kining tanang pagpanumpa, ug ang tanang uban pa, ug naipahigayon na ang seremonya:

⁹⁸ Sama nga, Broy ang apelyedo sa akong asawa sa wala pa kami niadto ikasal. Karon, dili na siya Broy. Branham na siya. Karon, dili na siya Broy. Siya'y Branham na.

⁹⁹ Ug pagnakasulod ka na kang Cristo, dili ka na iya sa kalibutan. Iya ka na ni Cristo. Kita n'yo? Dayon dili mo na ginapanumbaling ang mga butang nga iya sa kalibutan. Patay na ang mga niini alang kanimo. “Kay siya nga nahigugma sa kalibutan o sa mga butang nga iya sa kalibutan, ang gugma sa Dios wala man lang diha kaniya.”

¹⁰⁰ Busa, nakita ninyo, dili ka puede mahimong artipisyal nga Cristohanon. Puede ka mahimong usa ka artepisyal, nga Cristohanon sa sulti lang.

¹⁰¹ Apan dili ka puede mahimong usa ka Cristohanon, nga ingon niana, gawas nga isulod ni Cristo ang Iyang Kaugalingon, pinaagi sa bautismo sa Espiritu Santo, diha kanimo. Kung mahitabo man kana konektado ka na ngadto Kaniya. Dili na

kamo duha. Usa na kamo. Nagsaad si Cristo nga maanaa Siya kanato, maingon man nga ang Amahan anaa kang Cristo. “Ako ug ang Akong Amahan Usa ra. Ikaw ug Ako Usa ra.” Kita n’yo? Si Cristo nga anaa sa sulod nato! Ang tanan nga anaa sa Dios, gibubo Niya ngadto kang Cristo. Ug ang tanang anaa kang Cristo, gibubo Niya ngadto sa Iglesia, aron ipadayon ang buluhaton sa Ebanghelyo.

¹⁰² Mao nga ingon niana kita, dili tungod sa artepisyal nga ngalan, kondili tungod sa realidad sa Balaang Espiritu sa Kinabuhi nga nagakonekta kanato ngadto kang Cristo. Dayon, pinaagi sa gahum sa Iyang pagkabanhaw, kita gibangon gikan sa mga patay nga mga butang nga iya sa kalibutan, ug gipalingkod kauban Niya sa Langitnong mga dapit. Amen. Gusto ko kana. Karong gabhiona, nanaglingkod kita diha sa Langitnong dapit ni Cristo Jesus, kita n’yo, nga gibanhaw na kauban Niya; namatay na sa mga butang nga iya sa kalibutan, ug gidawat na si Cristo. Ug sa diha nga gidawat na nato si Cristo, kung ingon niana patay na ang kalibutan, nan wala na kita’y pagpanumbaling sa kalibutan. Patay na ang kalibutan alang kanato. Ug atong . . . Ug patay na kini alang kanato, ug patay na kita alang niini.

¹⁰³ Lahi ka na nga tawo, lahi na nga personalidad, tungod kay usa ka nang bag-ong binuhat. Binuhat! Dili ang kanhi ra nga binuhat, nga pinasinaw lang; dili usa—usa ka tawong nag-abri lang og bag-ong panid sa kinabuhi. Kondili usa gayud ka tawong namatay, ug gipanganak pag-usab, ug nahimong bag-ong binuhat diha kang Cristo Jesus, ug ang Espiritu sa buhi nga Dios nagakinabuhi na sa nianang tawo.

¹⁰⁴ Karon, sama sa usa ka babayeng dili na Broy, Branham na siya, ug ingon na niana ang ngalan niya.

¹⁰⁵ Ug ang Iglesia dili na iya sa kalibutan, kondili anaa na sa Ngalan ni Cristo, ingon niana siya. Konektado na siya ngadto kang Cristo, pinaagi sa Iya mismong Kinabuhi.

¹⁰⁶ Nabasa na ba ninyo sa Kasulatan, kung unsa nga ang unang tawo, nga gibuhad sa Dios, usa—usa ka tawong may duruha ka personalidad? Si Adan parehong Adan ug Iba kaniadto, sa espirituhanong pagkasulti, kon diim gibuhad Niya ang unang tawo diha sa Iya mismong hulagway. “Ug ang Dios Espiritu.” Apan, sa dihang gipahimutang na Niya sila sa lawas, gibuwag Niya sila. Gikuha Niya ang panglalaki nga espiritu, og gipahimutang kadto sa lalaki, ug gikuha ang pangbabaye nga espiritu ug gipahimutang kadto sa babaye.

¹⁰⁷ Karon, pagmay makita kamo og usa ka babayeng nagalihok nga sama sa lalaki, aduna gyu’y butang nga sayup. Pagmay makita kamo og usa ka lalaki nga nagalihok nga sama sa usa ka babaye, aduna gyu’y butang nga sayup. Busa makita ninyo nga ang kalibutan tinuis na gayud, karon. Nagapaninguha ang mga

kalalaken-an nga manglihok nga sama sa usa ka babaye; ang mga kababayan-an pud nga sama sa mga kalalaken-an. Husto kana. Tinuod kana.

¹⁰⁸ Karon tan-awa ninyo. Tuman kini ka hingpit, nga sa dihang gikuha sa Dios ug gihimo ang tawo, ug aron ipakita nga dili Niya gustong magsumikad kini sa kung unsa man nga uban pa, wala ang babaye kaniadto sa orihinal nga paglalang. Busa wala ang babaye sa maong paglalang, kondili usa siya ka kabahin ni Adan. Usa lang siya ka produkto gikan sa orihinal. Ang Dios may gikuha gikan sa kiliran ni Adan, dili aron magbuhat og usa pa ka linalang, kondili mikuha lang og kabahin gikan sa usa ka linalang ug mibuhat og usa pa gikan niini. Ug gikuha Niya ang panglalaking espiritu nga anaa kang Adan. . . Ug gikuha ang pangbabaye nga espiritu nga atua kang Adan, diay, ug gibutang kadto sa babaye. Busa, parehong espiritu ug lawas, nahimong usa ra sila.

¹⁰⁹ Pagkatahum nga tipo sa kung unsa ang gibuhat sa Dios didto sa Kalbaryo. Gikuha Niya si Cristo, ug gikonecta Siya sa Iglesia, pinaagi sa gidughang kiliran, gipaagas Niya ang Dugo nga naghinlo sa tawo, nga maoy nagpabalaan sa lawas sa Iglesia, ug gipahimutang ang Espiritu sa buhi nga Dios, nga gikuha Niya gikan didto sa krus, gikan kang Cristo, ug gipahimutang kini ngadto sa indibiduwal. Dayon nahimong usa ra sila. Nahimong usa ra sila. Si Cristo ug kamo nahimong usa ra.

¹¹⁰ Ug bisan ikaw ug ang imong bana kinahanglan nga usa ra. Kung adunay pagkalahi, nan aduna gyu'y butang nga sayup sa inyong pagkahiusa.

¹¹¹ Ug kung may pagkalahi diha kanato, kang Cristo, nga dili kita motoo sa Iyang Pulong, nagaingon, “Oh, para lang kana sa ubang panahon,” aduna gyu'y sayup udan sa atong pagkahiusa Kaniya. Kung nagaingon kamo, “Milabay na ang mga adlaw sa mga milagro. Wala na’y ingon niana nga Balaanong pagpang-ayo; wala na’y ingon nianang bautismo sa Espiritu Santo,” nga ginapahinungod kini sa kaniadto pang mga panahon, kana nagapakita lang nga wala kaninyo ang Espiritu ni Cristo.

¹¹² Tungod kay, “Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod.” Ug sa diha nga ang Iyang Pulong naghari na diha kaninyo, nan, makita ninyo, kamo ug si Cristo usa ra kung ingon-ana. “Kung kamo nagapabilin Kanako, ug ang Akong Pulong nagapabilin kaninyo, hangyoon ninyo ang gusto ninyo,” tungod kay dili na kamo kana. Ang Pulong na kana sa Dios, si Cristo na kini nga anaa kaninyo. Nahimong usa na kamo. Sige.

¹¹³ Dayon, ang usa pa ka butang, human niyang gibuhat kana, human niyang natuman ang iyang mga pagpanumpa, ug misulod na sa kaminyoon, ug gidawat na ang apelyedo

sa iyang mamahimong bana, ang ngalan sa pamanhonon, nan mamahimong manununod na siya sa tanantanan nga panag-iyá sa lalaki. Siya’y manununod na sa tanang butang. Ang imong asawa manununod sa tanang butang nga imong panag-iyá.

¹¹⁴ Ug ingon niana pud ang Iglesia, kung kabalo lang siya niini, ingon nga siya kabahin Niya tungod sa Iyang Espiritu nga anaa sa Iglesia. Giingon niya, “Ang mga buhat nga Akong ginabuhát inyo usab pagabuhaton. Mas labaw pa gani ang inyong pagabuhaton, kay moadto man Ako sa Akong Amahan. Sa dili madugay, ug ang kalibutan dili na makakita Kanako; apan kamo makakita ra Kanako, kay Ako magauban man kaninyo, maana kaninyo, hangtud sa katapusan sa kalibutan.” Kung ingon-ana si Cristo kini nga anaa sa sulod ninyo. Konektado na kamo sa usa’g usa, ug kamo mga manununod uban Kaniya.

¹¹⁵ Ug kung ania Siya sa yuta, unsa man ang Iyang buhaton? Mao ra pud ang buhaton Niya sama kaniadto, tungod kay Siya ang mao sa gihapon kagahapon, karon, ug hangtud sa kahangturan. Kanunay Siyang may kaikag sa mga buluhaton sa Amahan. Magapang-ayo og mga tawong masakiton. Magapamuhát Siya og mga milagro. Buhaton Niya eksakto kung unsa ang gibuhát Niya niadtong ania pa Siya sa yuta, tungod nga nagapabilin Siya nga mao sa gihapon kagahapon, karon, ug hangtud sa kahangturan. Pagkahingpit gayud niini. Ingon niana ang kasal.

¹¹⁶ Apan, karon, unsa kaha kung nagpakasal na kining babaye, gipanumpa ang tanan niining mga pagpanumpa ug tanan na, ug siya nahimo nang asawa sa niining lalaki, ug nahimo nang manununod sa tanan nga panag-iyá sa lalaki, ug uban pa, ug dayon nagkabadlongon? Misugod siyang pagkadautan. Misugod siyang, ug nagkuyogkuyog sa ubang lalaki. Dili lamang kana, gipaambit niya ang iyang gugma ngadto sa uban. Ang lalaki ug ang iyang asawa, bisan pa sa tanang mga saad nga gikapanumpa nila sa usa’g usa, ug pagkahuman maglayaslayas ang babaye ug ipaambit ngadto sa uban ang iyang kinabuhi, ang gugma niya ug pagbati sa iyang bana ngadto sa uban.

¹¹⁷ Mao kana ang ginabuhát sa kadaghanang nag-patawag og Cristohanon, ginapaambit ninyo sa kalibutan ang inyong gugma: magduladula, magsayawsayaw, magsugalsugal, magpabilin lang sa balay bisan dunay panagtigum sa pag-ampo, aron magtan-aw og telebisyon, tanan na nga matang sa kalibutanong mga butang nga nagpuli sa luna sa gugma sa Dios, sa kasingkasing sa iglesia. Nagkadautan siya. Nahimo siyang badlongon. Naglayaslayas siya kuyog sa ubang lalaki. Ginapaambit pud niya ngadto sa uban ang iyang gugma. Ang ikapulo niya nga angay unta niyang ihatag sa iglesia; gastohon niya hinoon kini ngadto sa uban pang mga butang nga anaa sa kalibutan. Iyang... Imbes nga

higugmaon niya ang Dios sa paagi nga angay niyang buhaton, ug magkinabuhi alang sa Dios, ug higugmaon ang pagsimba, halos kinahanglan mo pa siyang hangyohangyoon aron lang mosimba.

¹¹⁸ Aba, nasayod gyud ako, dili pa lang dugay, usa—usa ka ministro ang nakasugilon kanako nga nagpanghatag siya og daghang prayer . . . daghan kaayong kard, aron aghaton ang mga tawo nga mopirma, sa usa ka pagpanumpa nga kinahanglan dili mominus sa unom ka bulan sulod sa usa ka tuig ang pagtambong nila sa Sunday school.

¹¹⁹ Ug aduna ko’y nakita og usa ka dalaga didto ubos sa bungtod, kon diin ako nagtrabaho. Ug migawas siya didto. Ug nagtindog ako didto sa mismong pultahan, nagpanuktok sa pultahan, ug miduol siya didto sa pultahan. Ug usa siya sa niining ginatawag nga mga wildcat player, kabalo na mo.

¹²⁰ Sama niining grupo nga ilang gidakup dinhi sa Phoenix niadtong miaging gabii, sa miaging gabii gyud kadto, nga ginahimo kining bag-ong kahiwian nga gitawag og—og rock-and-roll, o twisters, unsa man ang tawag nila niini, ug nagpakuha pa sila didto og mga pulis aron dakpon sila. Mga batan-on, wala n’yo ba nahibaloan nga espiritu kana sa yawa? Napailalum sila sa impluwensiya niini, hangtud nga wala na sila sa ilang kaugalingon, atua sa kadalanan, nga unsa na lang ang ginahimo.

¹²¹ Sama niining mga komedyante, o niining mga tigpatukar og plaka, ug mga nagpatunog sa radio, ug uban pa, nga nanganha, sa siyudad kung diin atua ako didto. Ug panghukason sa mga kadalagahan ang pang-ilalum nilang bisti ug iitsa kini didto sa entablado, para mapirmahan sa niining mga lalakihan. Wala n’yo ba nahibaloan nga iya kana sa yawa? Espiritu kini sa kaulahiang mga adlaw. Sigurado. Makauulaw kaayo. Tan-awa n’yo, nagpatuyang na gyud.

¹²² Kining dalagaha, migawas siya, nga ingon niadtong ang gibuhat. Wala man lang niya ako nahimatikdan . . . Nalimtan niya nga nagatindog ako didto sa pultahan. Ug miingon siya, “Oh, pasencia na. Nalimtan ko nga anaa man diay ka dinha nagatindog.” Ug nagsinyas siya og halok ngadto sa lalaki sa radyo, o mora’g ingon niana, ug miingon, “Magkita ta sa Green Briar Patch,” o asa man kadto. Aduna sila og unsa man nga sayawan niadtong gabhiona.

Ug akong gisugilon kadto kang Dr. Brown, nga higala ko.

¹²³ Ingon niya, “Kumusta na man ang kahimtang sa imong kongregasyon didto, Billy?”

Ingon ko, “Maayo man.” Ingon ko, “Ginapainom namo sila og mga pills?”

Miingon siya, “Unsa man pud nga matang sa pills?”

124 Ingon ko, “Ebanghelyo. Siguradong magsige gyud sila balikbalik tungod niana.” Kita n’yo?

125 Ug naisugilon pud niya sa ako bahin kadtong, pagpirma na niadtong mga pagpanumpa. Ug miingon ko, “Dr. Brown, sa hunahuna mo ba kadtong wildcat player nga nagpatunog sa plaka sa radyo nagkinahanglan pa og pirma nga pagpanumpa gikan sa maong babaye aron mouban niadtong gabhiona? Wala na kinahanglana. Iprenda pa gani siguro sa maong dalaga ang unsa man nga bisti nga aduna siya, aron lang makaadto didto.” Ngano man? May sa kung unsang butang nga anaa niya nga nagapakonekta kaniya, usa ka espiritu, ngadto sa makalibutanong kalipayan.

126 Ug hangtud nga ang Iglesia sa buhi nga Dios, nga gitawag nga Pangasaw-onon ni Cristo, maikonekta ang iyang kaugalingon ngadto sa Dios nga sama niana, maglunang pa sa gihapon siya nianang kalibutana, sa lapukon nga yanang sa kasal-anan, hangtud nga maikonekta siya ngadto sa Dios sa paagi, nga ang iyang kasingkasing mapuno gyud sa himaya ug gahum sa Dios, hangtud nga wala na siyang makitang uban pa kondili si Cristo lamang. Husto kana.

127 Mao kana ang atong kinahanglan buhaton. Mao lamang kana ang bugtong paagi, ang bugtong programa nga aduna ang Dios, ang buhaton ang butang nga sama niana. Dili mahimong artipisyal lang ang pagkatapot sa inyo. Kinahanglan nga naipanganak kamo sa sulod, dili tungod lang sa pagpakiglaman, o tungod nagpadala mo’g sulat sa iglesia. Kondili tungod nga gipanganak ka sulod sa Iglesia sa buhi nga Dios, tungod nga gipanganak ka pag-usab, tungod sa gahum sa pagkabanhaw ni Jesus Cristo, maoy naghimo kanimong bag-ong binuhat diha Kaniya. Amen. Kana ang motul-id niana. Mao kana ang nagpaingon niana. Sigurado. Sige.

128 Nagkadautan siya. Ginapaambit pud niya ang iyang gugma ngadto sa uban, nga mga kalibutanong butang, mga kalipayan sa kalibutan, nagaadto sa mga lugar nga dili niya angay adtoan, nagapanulti sa mga butang nga dili niya angay igasulti.

129 Dinhi usa ka higayon akong...Aduna sila og pang-babayeng...usa ka matang sa party nga iya sa simbahan. Nahitabo lang nga aduna ko’y kinahanglan buhaton didto sa ubos sa niining balay. Ug sultihan ko kamo, nakadungog na ako og makauulaw’ng mga butang niadtong makasasala pa ako, apan, niadtong tigum sa mga kababayan-an, kadto pa lang ako nakadungog og mahilas nga tiaw-tiaw sa tibukong kinabuhi. Mahunahuna kaha niyong, ang usa ka tawo nga nagpatawag og Cristohanon, magpasagad lang nga mangingibabaw kanila ang ingon niana nga kahugawan?

130 Dili ka makasag-ob og matam-is ug hinlo nga tubig gikan sa mao rang atabay. Magkalus ka og timba sa atabay, ug pagbira

mo puno og mga wayawaya, sama sa tawag namo niini. Kung ihulog mo pag-usab kana nga timba, mao ra sa gihapon ang imong makuha. Kinahanglan mahinloan og maayo ang maong atabay, ug pun-on kini sa mahinlo nga tubig.

¹³¹ Ingon niana ang nagakahitabo sa kaiglesiahan karon, sa pangkinatibuk-ang pagkasulti, mao nga kinahanglan siyang mahinloan og ayo, og pun-on sa balaang tubig sa Dios nga gikan sa Langit. Ang kasingkasing niya nahimo nang awasanan sa bisan unsa na lang nga mahugawn'g butang. Daghan na kaayo siyang ubang ginahigugma. Giingon sa Biblia nga magkaaduna siya'y nagkalainlaing ginahigugma. "Magmahigugmaon siya sa mga kalingawan labi kay sa paghigugma sa Dios, dili malukmay, tigbutangbutang, dili mapugnganon, ug dili mahigugmaon sa maayo."

¹³² Tan-awa n'yo ang usa ka babaye nga naningkamot nga magkinabuhing husto, usa ka lalaking naningkamot nga magkinabuhing husto, siya nahimong, "holy-roller," nahimo siyang, "panatiko," o kung unsa nga maka-kinaraan. Sinalikway siya. Siya'y gitamay ug sinalikway sa mga tawo niining kalibutana. Husto kana.

¹³³ Apan nahimatikdan ba ninyo kung unsa ang angay buhaton sa matuod nga Iglesia? Sa Daang Tugon, pagbuhaton nila ang—ang paghalad, patyon nila ang usa ka langgam, ug ipatulo kadtong dugo ngadto sa usa pa ka langgam, niadtong patay niining kauban; ug molupad kadto sa kayutaan, samtang ginapakaylap ang dugo niadtong patay nga kauban niini. Sa diha ang Iglesia nahimong matuod nga Pangasaw-onon ni Jesus Cristo, pagadalhon niya ang Dugo ni Jesus Cristo, nga ginawisikan ang yuta niini, nagatuaw og, "Balaan, balaan, balaan, ngadto sa Ginoo." Ang sa mga palibot niya, ang matag tipik sa kaugalingon niya mamahimong iya sa Dios. Ang iyang kinatibuk-an mamahimong iya sa Dios. Wala ka na makita pang uban.

¹³⁴ Mao kana kon ngano nga adunay mga tawong nagasimba, usab. Dili aron magdula og mga baraha ug magdula og poker, magsayawsayaw dinha sa basement sa simbahan, magkumbira og pangsosyalan nga panihapon ug sama nianang butanga. Iya kana sa kalibutan. Ug dili gayud kita angay nga mahimong sama kanila, ug makauulaw alang kanato nga mahimong sama kanila. Kinahanglan natong iwali ang Espiritu Santo, diha sa gahum, ug diha sa pagkabanhaw ni Cristo. Adunay butang kita nga wala kanila. Ikinabuhi nato kini, dili nato sila awat-awat. Ikinabuhi nato ang nahibaloan natong husto. Magkinabuhi diha kang Cristo. Miingon si Jesus, "Kung ikaisa na Ako, kabigon Ko ang tanan nganhi Kanako. Kamo mao ang asin alang sa yuta. Apan kon ang asin nawad-an sa iyang lami, nan dili na gayud magpulos sa bisan unsa kondili isalibay sa gawas

ug tunobtunoban sa mga tawo.” Bantayon gyud atong mga testimonyo!

¹³⁵ Dili na ikatingala, nga bisan ang mga Pentecostal natong grupo, bisan nga ayaw ko untang isulti kini, nangahulog ang mga Pentecostal natong grupo sa ingon nianang butang, sa mao rang dagan sa karon. Ug dili usab ikatingala nga wala gayudsa mga tawo ang mga ginaingon nila nga aduna kanila. Kining Iglesia sa niining Pentecostal nga kalihokan angay unta nga maputos gayud sa Dios nga Makagagahum-sa-tanan, hangtud nga ang mismong Kinabuhi ni Jesus Cristo mareplektar diha Kaniya.

¹³⁶ Apan gusto natong awaton ang kalibutan. “Buhaton namo kini, bisan pa man.” Kita n’yo? “Gusto namo nga kami ang masunod niini.” Apan ayaw gayud buhata kini. Sayup gayud kung buhaton kini. Ang mga kaiglesihan daw sama sa usa ka babaye, nga nagpatuyang na sa kadautan.

¹³⁷ Mahibaloan n’yo nga sa sugod, okey pa siya, niadtong sinugdanan nga gihimugso sa Dios kining Iglesiang pentecostal, mga kuwarenta o singkwenta ka tuig na ang milabay. Nagkinabuhi siya nga may pagkabalaan. Balaan siya kaniadto. Ang gahum sa Dios nagauban kaniya. Apan sa pagpadayon nato, hinayhinay kitang nahimo nang sama sa kalibutan.

¹³⁸ Mahibaloan mo nalang, gusto na natong magkaadunay dakung simbahan nga mas daku pa sa bilding sa Methodist sa mismong sunod nga kanto. Gusto nato nga kinahanglan aduna gyud kanato ang mas daku nga butang, ang pinakadakung butang, ug ang pinakadakung butang, ug ang pinakadakung butang. Makauulaw gyud. Daghan kanato ang nahimong mapahitas-on na kung anaa sa sa dihang kita’y... Pagmay makita ang usa ka igsoong Pentecostal og usa ka tawo didto, nga nagtambong didto sa gamay’ng panagtigum, o diyutay’ng iglesia, ug sila pud nagtambong sa usa ka dakung simbahan. “Miyembro kami sa unang iglesia, o sa dakung iglesia,” o butang nga sama niana; ginakaminusan ang uban.

¹³⁹ Ang gikinahanglan ninyo mao ang Espiritu Santo, nga magtanggap sa inyong pagkamapahitas-on, husto kana, magpahibalo kaninyo nga ang tinuod og matuod nga bautismo sa Espiritu Santo ang maoy makapahimo sa usa ka nakaternong tuxedo nga gakoson ang usa ka nakasuot pang-trabahante lamang ug ingnon, “igsoon.” Husto. Ang tinuod nga pangkinaraang kaluwasan, og gahum sa Dios nga Makagagahum-sa-tanan, oo, sir, maoy magpahimo sa usa ka nagsul-ob og mahalon nga sedang bisti nga gakoson ang usa ka nagsul-ob lang og baratohon nga panapton, ug ingnon, “Igsoong babaye, gimahal ko ikaw.” Sigurado gyud.

¹⁴⁰ Apan hinayhinay na kitang nakigsandurot sa kalibutan, nga nagpaanud na sa sulog sa kalibutan. Ingon niana ang nahitabo mismo sa atong iglesia. Dili na nato kinahanglan pa

nga hisgotan ang bahin sa mga Methodist ug mga Baptist. Sa kaugalingon nalang nato mismo. Sa ato na lang mismo dinhi. Mao kana ang hinungdan kung ngano nga dili makapanglihok ang Espiritu Santo. Mao kana ang hinungdan kung nganong ginaingon ko nga dili mapahiluna sa Dios ang Iyang pag-uyon sa unsa mang organisasyon karong gabhiona. Tungod kay, wala gikuha pagawas ang mga Gentil ingon nga nasud. Tagsatagsa silang gikuha gikan sa mga Gentil, tungod sa Iyang Ngalan. Indibidwal ang ginakuha sa Dios.

¹⁴¹ Karon, siguro maayo pud ang ginahimo sa atong mga organisasyon. Maayo man. Apan dili kamo puedeng mosalig niana, moingon, “Pentecostal ako, kay miyembro man ako sa usa ka organisasyong Pentecostal.” Pentecostal ka lang kung nagkaaduna ka og kasinatiang pentecostal. Dili ko igsapayan kon miyembro ka man sa simbahang Katoliko, pentecostal ka. Dili ninyo mahimong organisahon ang pentecostal. Ang pentecostal mao’y usa ka kasinatian, dili usa ka organisasyon. Ug husto kana.

¹⁴² Pero kita nga mga Pentecostal ang gihunahuna nato, tungod nga kita aduna og ngalan nga Pentecostes, mamahimo na nato nga magpadayon ug magkinabuhi nga kalibutanon, buhaton ang unsa mang gustohon nato. Mora lang og nagsaka kita sa tore ni Nimrod; mosangput lang kini sa abo. Sama sa pangtabon ni Adan nga dahon sa higuera; madugta lang kini. Sama sa Siegfried line sa France, sa Maginot line sa Germany; naguba lang.

¹⁴³ Tungod, wala na’y uban pa nga tore, wala na’y uban pa nga tongtonganan. “Kondili ang Ngalan sa Ginoo mao’y gamhanang tore nga ang matarung nagadalagan ngadto ug may kaluwasan.” Kung modagan ka paingon Niini, ginadawat mo ang Ngalan, ang Ngalan; dili basta lang nga napangalanan ka sa maong Ngalan, kondili ang Ngalan ug ang tibuok mong pagka-ikaw, sama na ni Cristo ang imong pagkinabuhi. Amen. Kahibulongan gayud Siya. Oo.

¹⁴⁴ Ingon niana ang ginahimo sa iglesia, espirituhanong nagapanapaw, sama sa usa ka babaye nga ginapaambit niya ang iyang gugma sa ubang lalaki nga angay lang unta sa iyang bana. Dili gyud angay nga makauban sa kinabuhi ang ingon anang babaye. Kabalo kamo niana. Ug sa diha nga hinayhinay nang ginapaambit sa iglesia ngadto sa kalibutan ang iyang pagpakig-fellowship, ang Dios mao’y Dios nga abughuan. Gibuwagan Niya kaniadto ang Israel tungod niana, ug ingon niana usab ang pagabuhaton sa Iyang Anak.

¹⁴⁵ Magkaaduna ang Dios og Pangasaw-onon nga wala’y kunot nga makita diha Kaniya. Amen. Siya’y bug-os gayud nahugasan pinaagi sa Kaugalingong Dugo sa Dios. Husto kana. Busa makita

nato kung asa kita nagabarug, ang kasal nakaandam na nga mahitabo.

¹⁴⁶ Karon, nahibaloan nato nga nakahimo siya og espirituhanong mga pagpanapaw, nagkuyog-kuyog sa kalibutan, ingon niini ang ginapamahayag, pero lahi sa gikinabuhi. Dili gyud kini magpulos. Ang angay buhaton sa iglesia, mao'y buhaton ang parehong gibuhat ni Esther. Gisalikway ni Esther kaniadto ang pagpatahum nga iya sa kalibutan.

¹⁴⁷ Nahibalo kita sa nianang gamay'ng basahon ni Ester, kung unsa nga si Mardocheo. . . Ang iyang uyoan aduna og anak nga babaye. Ug panahon kadto sa paghari sa Medo ug sa mga taga-Persia. Usa kini ka matahum nga tipo. Ang hari, usa sa pinakabantogan nga hari sa kalibutan niadtong panahona, nagpahigayon siya og usa ka dakung pista. Ug gipatawag niya ang rayna aron maglingkod tupad kaniya, apan nagdumili ang maong rayna. Nagbalibad ang rayna nga buhaton kadto. Busa unsay gibuhat sa hari? Hilabihan gyud siyang napaulawan, nga dili na niya hingbaloan kung unsa ang iyang buhaton, nga dili moadto ang mismo niyang asawa.

¹⁴⁸ Sa hunahuna ko ingon niana usab si Cristo karon. Gidapit na kita ni Cristo nga magalingkod sa Langitnong mga dapit kauban Niya, ug ginakaulaw nato kini. Daghang tawo ang naulaw magpahayag nga naangkon nila ang bautismo sa Espiritu Santo. Mga Pentecostal pa gyud, husto kana, naulaw sila sa pagpahayag niini. Gikaulaw nato Siya.

¹⁴⁹ Ug busa nagdumili sa pag-adto ang rayna. Nagbalibad kini nga moadto. Napaulawan ang hari tungod niini. Namula ang iyang nawong. Nahimatikdan sa tanan.

¹⁵⁰ Nahunahuna ko hinoon kung dili ba kaha mamula og gamay ang nawong ni Jesus, sama kaniadto, kung tawagon Niya kita para sa usa ka buluhaton, tawagon ang kalihokang Pentecostal para sa usa ka pagpakig-fellowship ug pagkamanagsoon, ug hilabihan na kita ka organisado ngadto sa gagmay-gagmay'n'g grupo nga dili man lang gani mahimong magpaubos sa uban. Kita'y, nahimo nang maka-kalibutanon na kaayo ug mga ingon nianang butang, ginakaulaw na nato ang ngalang pentecostes. Nahadlok ang pipila ka tawo nga magpahayag. Nagaingon, "Bueno, ako—miyembro ako sa. . . Usa ako ka Cristohanon, pero. . ." Ako gani nagmalipayon nga nakaangkon og kasinatiang pentecostal. Amen. Malipayon akong dala-dala ko ang Ngalan ni Jesus Cristo. Kini ang pinakadakung pribilihiyo nga naangkon ko sukad-sukad, ang isulti nga ako kabahin Niya.

¹⁵¹ Karon nahibaloan nato, pagkahuman niadto, nagpatawag kadtong hari og pipila ka magtatambag, aron pangatan-on kung unsay angay niyang buhaton. Ug miingon sila, "Kung

magpadayon kini nga sama niana, ang tanang uban pa nga kababayen-an sa tibuok nasud magasundog sa gibuhat sa unang ginang.”

¹⁵² Siyempre, ingon niana gayud ang nagakahitabo karong gabhiona. Ginalantaw ko ang pipila sa niining mga kababayen-an dinhi. Nagalaum ko nga wala ako makapasakit sa inyong mga pagbati, ug bisan pa man nabuhat ko na, nabuhat ko sa gihapon. Uh-huh. Hinoon. Ginapaninguhaan ninyong sundogon ang unsa mang ginapauso niining unang ginang, sama na lang nianang gitawag nga waterhead nga mga alut. Wala pa ako nakakita og sama niana sa tibuok kong kinabuhi.

¹⁵³ Niadtong usa ka adlaw adunay misulod sa usa ka tindahan kon diin gihulat ko didto ang akong asawa, ug ang buhok sa babaye ingon *niadto* ka daku, ug aduna siya og berdeng kolor sa ubos nga bahin sa iyang mga mata. Miingon ako, “Palayo ka, mangtas. Magbinuotan na ako.” Kadto na ang makahahadlok nga nakita ko sukadsukad. Mahadlok gyud ka niadto. Unsa man kadto? Ang unang ginang. Ingon niana ang unang ginang. Mao kadto. Ug ginahimo nila kana sunduganan.

¹⁵⁴ Ug tugoti ninyo nga isulti ko kini karon. Dili ko kini ginasulti nga may pagka-komedyang kondili nga mapasumbingayon, aron nga makita ninyo. Kamong mga hamtong na nga mga Cristohanon eksaktong ingon niana ang inyong ginabuhat para sa niining mga batan-on pa. Eksakto gyud. Angay kamong mamahimong mga sumbanan. Kamong mga Pentecostal nga nag-angkon nga aduna kaninyo ang Espiritu Santo, kamo unta ang mga sumbanan para sa mga Methodist, ug sa mga Baptist, ug sa mga Presbyterian. Dili nga mamahimong sama sa unang ginang, kondili sama unta kamo kang Jesus. Ginaingon na Niya sa inyo *Dinhi* kung unsay buhaton, kung unsaon usab sa pagbuhat niini. Kinahanglan natong sundon ang Iyang mga lagda ug mga sumbanan. Apan sa ingon na niana nga paagi nato naabtan kini. Si Ester . . .

¹⁵⁵ Kining rayna, ayaw niyang maminaw. Ayaw niyang moadto; gipakaulawan ang hari. Miingon, “Kung—kung ingon nianang sumbanan ang ginapakita nianang unang asawa sa kayutaan, aba ang tanang uban pa sa mga kababayen-an mosundog gyud niini. Busa sa diha dayon nga tawgon sa lalaki ang iyang asawa, moingon kining babaye, ‘Umambak ka na lang kaha sa suba.’” Kita n’yo? Grabe, natagna gyud niya ang mahitabo sa America, dili ba? Karon, nahibaloan nato, sa dihang nahitabo kini, may usa ka lalaki nga adunay kaalam, nga miduol ug nagtambag sa hari. Miingon siya, “Ang butang nga angay’ng buhaton mao ang isalikway siya. Ug ipahibalo sa tibuok nasud, ug ipatawag ang tanang mga dalaga, dalagang mga ulay, ug gikan kanila mopili ka sa maasawa mo.”

¹⁵⁶ Nalipay niini ang hari. Busa nagpasugo siya, ug nagpasugo siya sa mga tagdumala sa mga dalaga, ug uban pa, nga nanglakaw aron—aron kuhaon na ang tanang mga batan-ong dalaga og dapiton, ang mga maanyag nga kababayen-an sa tanang mga gingharian ug mga kaprobinsiyahanan nga iyang ginsakupan, ingon nga siya ang pinakagamhanan sa tibuk kalibutan.

¹⁵⁷ Ug sa gipahimo na niya, nalakip niadto ang batan-ong dalagang Judio. Siya mora og wala kahatagi'g pakabana sa katilingban, tungod kay, sama sa mga Gentil, kita n'yo, ginasalikway lang siya. Ug wala na siya'y amahan ug inahan. Ug si Mardocheo, nga uyoan niya ang nagpadaku kaniya. Ug gipaadto na siya didto, aron mahiapil.

¹⁵⁸ Ug ang ginabuhat nila, ginadala nila ang mga batan-ong dalaga aron mahinloan ang ayo sulod sa daghang mga bulan. Kinahanglan nilang pahumotan sila ug dayandayanan sa tanang klaseng mga pagpaanyag, ug bistihan sila og ayo, aron mamahimo silang takus nga moduol sa atubangan sa hari.

¹⁵⁹ Karon, ingon niana gayud ang gusto sa kalibutan nga ipasul-ob sa kaiglesiahan karon. Dayandayanan kini nga iya sa kalibutan; pasundogon kini sa mga butang sa kalibutan; nagapaninguhang makapangdani pa og daghang miyembro, kung unsa na lang ang ginapasulod sa ilang buluhaton. Grabe! Makaluluoy gyud. Usa ka organisasyon nga nagapaninguhang labwan ang usa pa, dawaton ang si bisan kinsa na lang aron mamahimong miyembro. Mahimo mo silang mapamiyembro nianang organisasyon, apan wala gayu'y paagi nga makasulod sila sa pagpakig-fellowship kang Cristo gawas kung nahinloan sila ug natawo pag-usab sa Espiritu sa Dios. Kana ang matuod. Mahimong nasulat dinha sa ilang libro ang ilang ngalan, apan wala kini nasulat didto sa Itaas, sa Libro sa Kinabuhi sa Cordero, ug nasulat pinaagi sa Dugo ni Ginoong Jesus.

¹⁶⁰ Tanan niadtong mga kababayen-an niadto, gidayandayanan nila ang ilang mga kaugalingon, aron magmaanyag tan-awon. Ug, oh, mahunahuna ko nga mga hitsuraan man sila, tingali kapareho sa unang asawa ug sa uban pa. Gidayandayanan gyud nila ang ilang mga kaugalingon tungod kay moatubang man sila sa hari.

¹⁶¹ Siguro ingon niana pud ang nagakahitabo sa atong mga kaiglesiahan sa karon. Gipanguhaan nilang madayandayanan ang ilang mga kaugalingon, sa kalibutanong paagi, nagapahigayon og mga kalibutanong kalipayan, nga adunay kalibutanong mga butang niini, nagabuhat og mga butang nga iya sa kalibutan, nagauban-uban sa kalibutan, nagadahum nga matagbo nila sa gihapon ang Hari. Dili nauyonan sa Dios ang mga ingon niana. Nagakaligutgot Siya niana. Apan gusto nato manglihok nga sama niining kalibutan.

¹⁶² Pipila sa mga iglesia nato karon, sama sa giingon ko, ginapaubos na nila ang mga sukaranan, nagakuha og mga diyakono, ug uban pa, sa iglesia, ug usahay mga pastor pa, nga kaupat o kalima na ka higayon gikasal, ug—ug ang pipila kanila nagapanigarilyo pa gyud. Moingon, “Ilang—madaog man nila kana. Okey ra man sila.” Usa ka gabii niana magkuha sila og tawong gikan sa balay-inuman, ug patindogon siya sa pulpito pagkasunod gabii. Wala ako nagatoo sa ingon nianang walay pulos nga butang. Nagatoo ako nga ang usa ka tawo kinahanglan nga napamatud-an una, husto kana, mapamatud-an gyud. Isulti ko kaninyo, daghang higayon nga ang dahum nato . . .

¹⁶³ Nagatoo ako sa bautismo sa Espiritu Santo. Nagatoo ako sa pagsulti sa laing mga dila, apan sa hunahuna ko nasobrahan kita sa pagpatigbabaw niini. Mahimong makasulti ang usa ka lalaki diha sa laing mga dila, ug makasulti pud sa laing mga dila ang usa ka babaye, ug kung ang kinabuhi sa maong babaye ug ang kinabuhi sa maong lalaki wala nagasibo sa kung unsa nga laing dila ang ginasulti, nan sukwahi kana nga dila, tungod kay ang Balaang Espiritu ginapalihok ka lang Niya subay sa Biblia. Dalhon ka Niini ngadto sa kahupnganan sa bantayog ni Cristo.

¹⁶⁴ Tan-awa n’yo ang usa ka tawong nagasulti sa laing mga dila, nga tungod sa kainit sa ulo makig-away man gani bisan sa demotor nga gabas, ug manglibak og mga silingan, ug tanan na nga sama niana. Aba, matawag ba ninyo kana nga Espiritu Santo? Dili mamahimo. Dili gyud, sir.

¹⁶⁵ Ang Espiritu Santo mao ang pagkamalulot, kalipay, kalinaw, pagkamapuanguon, pagkamaayo, kaaghop, pailub, pagtoo. Ang Espiritu Santo, mga ingon niana ang bunga sa Espiritu, nga ipamunga sa Balaang Espiritu sa sulod sa Iglesia nga iya sa buhing Dios, kalumo, ug pagkamapainubsanon, pagpaubos, paghigugmaay sa usa’g usa, pagkamapuanguon.

¹⁶⁶ Kung mahisalaag man ngadto sa kadautan ang usa ka igsoon, dili ninyo basta na lang siya tamayon o kung unsa man. Adtoon ninyo siya ug tan-awon kung madala pa ninyo siya pabalik. Ayaw na ninyo hulata nga buhaton pa kana sa magwawali. Buhata na ninyo, bisan kinsa kaninyo. Dili man gud mahimong buhaton sa magwawali ang tanan niini, bisan sa mga diyakono. Ang tanan, nga miyembro sa Lawas ni Cristo, kinahanglan nga may kahingawa sa usa’g usa. Anaa kanato . . . Ug kung anaa kanato ang Espiritu ni Cristo sa sulod nato . . . Siya nagtudlo sa niining samingay. Gibiyaan nila ang nubentay nuebe, ug gipangita ang kadtong usa. Ingon niana ang angay natong buhaton. Apan ginaingon nato, “Oh, pasagdi sila.” Dili gyud nato buhaton kana. Gikinahanglan nato nga malomo, mapasayloon, mapuanguon. Mao kana ang bunga sa Espiritu.

¹⁶⁷ Karon, nahibaloan na nato pagkahuman, nga si Ester, pagkahuman niyang . . . Gipahimutang nila siya sa usa sa niining

mga lugar, aron nga madayandayanan ang iyang kaugalingon, para mapakita na siya sa Hari. Grabe! Gibalibaran niya kadto. Dili kadto ang gusto niya. Ang gusto niya nga pagmoatubang na siya didto susama lang sa kung unsa siya kanhi. Amen.

¹⁶⁸ May mga iglesia kita karon nga gustong manglihok nga sama gayud sa kalibutan, o tungod nga nangdagku na kita. Giingon sa Dios, “Usa niana kahigayon niadtong gamay pa siya, gialagaran nila Siya. Apan sa niadtong nagdaku na siya, gikalimtan na nila Siya.” Mao gyud kana.

¹⁶⁹ Kaniadtong mora og tugtug lata pa lang kita dinhi sa mga kanto sa kung asa man, gamit ang tamborin, ginahampak sa atong kamot; ug usa ka daang gitara, ang ginakaskas; ug usa ka panagtigum ang ginapahigayon diha daplin sa dalan, mapainubsanon pa kamo kaniadto. Apan niadtong nagkaaduna na kita og bilding nga ang bili tulo o upat ka milyon nga dolyar, ug hilabihan ka dagku nga mga butang nga sama niana, nan nangahimo na kitang hilabihan ka mga arogante nga nahikalimot na dayon kita, husto kana, mga pinasinaw na sa kalibutan.

¹⁷⁰ Sa miaging adlaw didto ako sa lugar, sa usa ka igsoong holiness, may mga trabahador siya didto nga nagatrabaho kaniya. Ug ang matag babayeng atua didto nga mogawas sa oras nga ting-pangape, aron makapahulay-og-mangape, kadtong mga babaye didto mga mugbo ang ilang buhok ug nakapang-lipstick pa. Karon, moingon kamo, “Igsoong Branham, wala ka’y katungod aron isulti kana.” May katungod ako. Ang Biblia mismo ang nagasulti niana. Husto kana.

¹⁷¹ Daghang mga kababayan-ang Pentecostal ang nagasul-ob og mga bistu nga iya sa lalaki, ug giingon sa Dios nga usa ka dulumtanan kini sa Iyang panan-aw. Husto kana. Unsaon pa ninyo sa pagdahum nga makaadto kamo sa Langit nga ingon niana? Nagapakita lang kana nga wala dinha sa sulod ang Espiritu Santo. Kung anaa sa sulod ang Espiritu Santo, ginabadlong kamo Niini. Husto. Oh, makasinggit man kamo, makasulti og laing mga dila, makadagan paadto-nganhi, makasayaw diha sa espiritu. Nakita ko pud nga ginabuhat kana sa mga Hindu, ug sa mga Indian, ug sa tanang uban pa. Wala kadto’y bili, gawas nga aduna og kinabuhi nga magpamatuod sa ginaingon ninyo, ang gahum nga iya sa Espiritu Santo, nga magahimo sa mga tawo nga magkinabuhi nga balaan. Mao kana ang Pangasaw-onon ni Cristo.

¹⁷² Si Ester ang mamahimo gyud niadto nga pangasaw-onon, busa gibalibaran niya ang unsa mang pagdayandayan nga iya sa kalibutan. Ang gusto niya nga mosulod siya, moatubang sa hari, ingon nga kung unsa lang siya. Gidayandayanan niya ang iyang kaugalingon sa paagi nga angay unta buhaton sa mga kababayan-an nga pentecostal, sa usa ka maaghop og

mapainubsanon nga espiritu. Ug sa dihang nangagi na kadtong mga magarbong, mamahimong mga unang ginang unta, sul-ob kadtong mga pandanggo nilang mga butang, gitan-aw lang sila sa hari, ug gipangbutang sila didto sa lawak kauban sa ubang mga babayeng ginapuyopuyo sa hari. Apan sa dihang nakita niya si Ester, ug nakaplagan niya ang katahum, kamapainubsanon, pagkamaaghop nga espiritu niini, giingon niya, “Kana na siya. Lakaw og kuhaa ang korona ug ipahimutang sa iyang ulo.” Ingon niana.

¹⁷³ Kinahanglan ninyo sila nga sul-oban sa ingon niana nga matang sa espiritu, dili lamang ang mga kababayen-an, kondili ang mga kalalaken-an, usab, magsul-ob sa ingon niana nga matang sa espiritu. Pagkahuman niana kamo mamahimong andam na aron nga mahimong Pangasaw-onon, malulot, matinahuron. Gihimo ni Ester nga hinlo ang iyang kasingkasing.

¹⁷⁴ Daghan kaayo atong gikabalak-an, ilabina sa niining panggawas, oh, nagkinahanglan daw kini og klase-klaseng pangtangtang sa kunot, ug klase-klaseng *ingon-niini*, aron—aron nga kabisihan.

¹⁷⁵ Dinhi dili pa lang dugay, nagatindog ako niadto sa usa—usa ka museo sa Tennessee. Nakaagi ako sa usa ka gamay’ng dapit didto, ug may nagpakita niadto og pag-analisar sa lawas sa tawo. Nag-ingon kini nga ang tawo kono nga may gibug-aton nga usa ka gatus og singkwenta libra, sa kemikal nagkantidad lang og otsentay-kuwatro sentimos. Karon, mora ka’g kinsa, pero dili ba, otsentay-kuwatro sentimos ra diay ka? Ug pipila sa mga kababayen-an, mga kababayen-ang Pentecostal, magsul-ob og lima-kagatus-kadolyar ang presyo sa kupo nga hinimo og balhibo sa mananap ug hangad-hangad na dayon sila niana, nga kung ulanon, malumos man pud sila nga sul-ob kana, ug wala man lang gani sila magkantidad og otsentay-kuwatro sentimos, husto kana, sa kemikal. Kamatuoran kana, dili tiawtiaw. Tinuod gyud kana. Otsentay-kuwatro sentimos, mga igo lang nga kantidad pag-ipalit sa kalburo nga ipangsabwag sa pugaran sa manok, ug diyutay’ng calcium ug uban pa. Otsentay-kuwatro sentimos, pamalandunga ninyo kana og ayo.

¹⁷⁶ Pagmoadto ka sa karinderya ug pagmay makita ka’g... hukaran ka’g usa ka yahong nga sabaw ug dihay lawalawa niana, siguradong idemanda mo ang tag-iya sa karinderya.

¹⁷⁷ Apan gipasagdan ninyo ang yawa nga hungitan kamo og dugay nang mahugaw kaayong telebisyon ug sa mga butang nga baraha pasulod sa inyong tutunlan, ug gitulon pud ninyo; ginapasul-ob kamo og mahilas nga mga bisti, ang mga kababayen-an, sama niining gagmay’ng hugot kaayong bisti nga mora og longganisang-pinutos, ug maglakaw-lakaw sa kadalanan nga ingon niana. Ug kabalo ka ba, igsoon kong

babaye, wala ko kini ginasulti nga nagatiaw-tiaw. Ingnon pa ninyo nga sayup ako.

¹⁷⁸ Paminaw. Ginasulti ko gyud kini. Pagmanglihok kamo nga sama niana, ug didto sa Adlaw sa Paghukom mahiapil kamo nga usa ka mananapaw. Husto. Nag-ingon ni Jesus, “Ang si bisan kinsa nga nagatan-aw sa usa ka babaye sa pagkaibog kaniya, nakapanapaw na uban kaniya sa iyang kasingkasing.” Ug kung adunay makasasala nga kinahanglan manubag tungod sa pagpanapaw, kinsa man kini? Ikaw. Kinsa ang hinungdan niini? Ikaw. Husto kana. Kung gipasundayag ninyo ang inyong kaugalingon didto, aron makita sa mga kalalaken-an, aron mahimong pareho sa kalibutan ug magbisti pareho sa kalibutan.

¹⁷⁹ Gisulti ko kana usa ka higayon, ug may usa ka babaye, nga taga-Louisville, Kentucky, miingon siya, “Bueno, maminaw ka, Mr. Branham. Gusto kong masabtan mo kini!”

Miingon ko, “Oo, madam?”

Miingon siya, “Mao lang kana nga klase sa mga sinina ang ilang ginahimo.”

Miingon ko, “Nagahimo pa man sila og makinang igpanahi ug nagabaligya og mga tela.”

¹⁸⁰ Kini tungod sa maoy gusto ninyo. Aduna sa kung unsay sayup nga anaa sa inyo. Eksakto gyud kana. Ginabuhat ninyo kana dili tungod nga kini mao ang urog. Ginabuhat ninyo kana dili tungod nga kinahanglan ninyong buhaton. Ginabuhat ninyo kana tungod kay gigusto man ninyo.

¹⁸¹ Nanigarilyo kamo tungod kay gigusto ninyo. Dili man unta ninyo kini kinahanglan. Siguro ang pinakahinangal nga butang nga nakita ko sukadsukad mao ang usa ka babaye nga nagaagi sa dalan, sama sa kasagaran ninyong makita, sa sakyanan, nga kimpit-kimpit ang sigarilyo sa tunga sa ilang mga tudlo. Aba, makauulaw kini. Mao kana ang pinakadakung pagsabotaheng magpahugno niining atong nasud, diin nagaingon na ang mga doktor ug siyensiya sa medisina nga puno kini og kanser ug sa tanan nang uban pa. Ug padayon nila kini nga ginayupyop, sa gihapon.

¹⁸² Tan-awa ninyo ang usa ka babaye, usa kono siya ka Cristohanon, nagpabulad didto sa lapyahan, kasagol ang lalaki-og-babaye nga nangaligo didto, og naka-bathing suit lang, nagpabulad sa adlaw. Aduna ako og duha ka anak nga babaye. Dili ko makaingon nga dili nila kini buhaton. Kung ingnon nila nga magpaitum sila og panit. Makatilaw pud gyud sila sa pagpaitum og panit samtang buhi pa ako. Mangitum gyud sila nga *ingon-niini*. Kita n’yo? Makatilaw gyud sila og pagpangitum gikan kang Mr. Branham, gamit ang panglapdos nga *ingon niini* kataas. Nagatoo man gud ko nga sayup kana.

183 Dayon tawgon nato ang atong kaugalingon, “Oh, miyembro kami sa iglesiang Pentecostal.” Oh, maulaw kamo! Husto. Nanginahanglan og paghinlo ang iglesiang Pentecostal, gikan sa atubangan hangtud sa luyo niini, ug sa bodega ug sa pinakasilong, ug sa pinakaitaas. Husto kana. Ug bisan pa, luyo niining tanan, kini ang pinakalabing maayo nga nagkaaduna kita. Apan mamahimo kining. . .

184 Sama niadtong pag-rebolusyon ug sa panahon niadtong ni Joan of Arc, nanginahanglan ang France kaniadtong og usa ka rebolusyonaryo, pagkahuman nanginahanglan na pud sila og usa ka pangkontra-rebolusyonaryo aron itul-id ang pipila ka butang nga unang giaklasan nila.

185 Ug gikinahanglan pud sa iglesiang Pentecostal ang usa ka rebolusyon. Husto. Sigurado gyud. Usa ka pag-aklas batok sa mga butang nga sayup, ug sa pagdawat sa mga butang nga husto, amen, usa ka bautismo sa Espiritu Santo: “Usa ka Iglesiang ginaandam na ang Iyang Kaugalingon!”

186 Hinumdumi, wala gayud sukad. . . Dili ninyo mahimong ingnon, “Bueno, karon, miyembro ako sa *niining*, Assemblies. Miyembro ako sa Foursquare, o sa Church of God, o sa Jesus Name,” o—o sa kang binsa kinsa kanila. Dili gyud! Dili kamo mahimong makasulod sa kang bisan kinsa kanila.

187 Indibidwal ang pagtawag kaninyo sa Dios. Ug kamo ang gikinahanglan mahinloan, tungod kay, “Nagakuha Siya og usa ka katawhan gikan sa mga Gentil, alang sa Iyang Ngalan, nga Iyang Pangasaw-onon, sa Gentil.”

188 Gihinloan ni Ester ang iyang kaugalingon. Gihinloan niya ang iyang kasingkasing. Ingon niana kung unsay gihinloan niya. Ingon niana pud ang gikinahanglan sa iglesia: usa ka hinlong-kasingkasing.

“Giunsa mo man paghinlo ang imong kasingkasing, Igsoong Branham?”

189 “‘Gihugasan kini pinaagi sa tubig nga iya sa Pulong,’ pinaagi sa Dugo ni Jesus Cristo.”

190 Ginaingon sa Biblia nga sayup para sa mga kababayenan nga manglihok sa ingon nianang paagi, ug para sa mga kalalaken-an nga pasagdan silang manglihok nga ingon niana. Para kana sa inyong duha. Usa ka lalaki nga gipasagdan ang asawa niya nga mogawas didto sa dalan nga halos hubo, nga nagasul-ob og sama niana, ubos gayud ang respeto ko kaniya isip nga usa ka lalaki. Usa siya ka uto-uto. Husto kana. Gigamit lang siya ingon nga trapo sa iyang asawa. Makauulaw kamo. Angay kamong magpakalalaki.

191 Ug ang pastor nga pagapasagdan lang niya ang iyang iglesia sa ingon nianang mga butanga, nga wala man lang niya ginamakmak kana og ayo diha sa pulpito. Bayoton siya. Ang

gikinahanglan nato maoy mga lalaki, sa Ebanghelyo, dili tungod nga sul-ob ang guwantes pang-mason, kondili uban ang gahum ug pagpadayag sa Espiritu Santo, gamit ang Pulong. Ginaingon sa Biblia nga sayup ang ingon nianang mga butang. Sayup alang sa mga tawo nga buhaton ang ingon nianang mga butang, manglihok sa ingon nianang paagi. Kinahanglan kining iwali, ug ikinabuhi, ug bisan asa ka man. O, nagakinahanglan og hingpit nga paglimpyo ang iglesia, sa usa ka paghinlo.

¹⁹² Gihinlo og ayo ni Ester ang iyang kasingkasing sa atubangan sa Dios, milakaw didto ingon nga may malulot ug mapaubsanong espiritu; ingon niana ang Iglesia nga mamahimong usa ka Pangasaw-onon ni Cristo. Karon, hinumdumi, gisalikway ni Ester ang pagpaanyag nga iya sa kalibutan. Gisaligan niya ang Espiritu sulod sa iyang kasingkasing, sa pagpadulong niya ngadto sa atubangan sa hari.

¹⁹³ Ug ang babaye sa karon, ang iglesia nga nagdahum nga makasulod siya tungod nga mas daghan siyang mga miyembro, siya ang may pinakamaanindot og binistihan nga mga miyembro, siya ang may pinakadakung organisasyon, ang pinakadakung simbahan sa siyudad, ug mga ingon nianang butang, milyon ka milyas kahalayo kamong makasulod kung dinha kamo nakadepende.

¹⁹⁴ Kinahanglan ang malulot, buotan, matinahurong espiritu ngadto sa Pulong sa Dios, “gikahugasan na sa tubig sa Pulong,” ug ang Pulong nga anaa sa sulod kaninyo. Usa kini ka paghugas. Amen. Nanginahanglan ang iglesia og paghugas, usa ka kumpletong-Ebanghelyong paghugas. Husto kana. Dili nga nakulangan og paghugas, kondili usa ka kumpletong-Ebanghelyong paghugas, nahinloan na, “nga nahimo nang bag-ong nilalang diha kang Cristo Jesus.”

¹⁹⁵ Ang Pangasaw-onon ni Jesus dili usa ka mahugaw’ng pangasaw-onon. Dili Siya modawat og usa ka mahugaw’ng, Pangasaw-onon.

¹⁹⁶ Kung paadto ang usa ka babaye aron ikasal na, ug ang hitsura niya mora og naggikan didto sa tangkal sa baboy; ang lalaki kung aduna ma’y dignidad diha kaniya, dili gyud magpakasal kaniya. Pahinloon niya usá kini sa iyang kaugalingon.

¹⁹⁷ Ug sa pag-adto sa iglesia ni Cristo aron magpakasal, abi niya nga mahiapil siya sa Pangasaw-onon, ingon nga nakatapat ang tanan nga pagka-kalibutanon diha kaniya, dili mamahimong ingon niana ang Pangasaw-onon ni Cristo. Dili, sir.

Kinahanglan ko nang dalion.

¹⁹⁸ Bisan ang Iglesia ni Cristo, nga iya ni Ginoong Jesus Cristo, bisan kanang Iglesia nga dili nagkagidlay nga Iglesia, pero, nga sul-ob na man ang saksak-sinagol nga trapo sa mga

denominasyon. Dili niya kinahanglan mamahimong miyembro sa usa ka dakung denominasyon. Ang kinahanglan lang Niya'y mahugasan sa Dugo, mapalit sa Dugo. Dili nagaingon nga miyembro man kami sa pinakadakong iglesia, sa pinakadakong organisasyon, o sa *niini*, *niana*, o *uban pa*. Kinahanglan nga putli siya, gihinloan, balaan, wala'y buling o kunot, pinaagi sa Dugo sa iyang—iyang Manluluwas, nga si Jesus Cristo.

¹⁹⁹ Sama kang Ester, ang Tawong natago sulod sa iyang kasingkasing, Tawong anaa sa sulod, ang pagkamalulot ug pagkamahinuklogon nga Espiritu nga iya sa Dios, nga anaa sulod sa kasingkasing sa tawo; dili ang himaya ug pagka-klasiko nga iya sa kalibutan.

²⁰⁰ Kanunay kong ginaingon nga nagakidlap ang kalibutan; ang Ebanghelyo usab nagasidlak. Oh, minilyon ka milya ang kahalayo nila. Nagakidlap ang Hollywood; ang Iglesia ni Cristo nagasidlak sa katahum, ug kalumo, ug kalulot, kamaloloy-on. Husto kana.

²⁰¹ Ayaw ni Ester nga mapaanyagan ang iyang kaugalingon sa tanan niining mga modernong binistihan nga iya sa kalibutan. Dili man gud kadto magpahitsura kaniya og asawa sa hari.

²⁰² Ug kita, nga gustong mahimong pareho sa kalibutan, ug sa tan-aw n'yo ba maghitsura kamong Asawa sa usa ka Balaang Tawo? Kita, ingon nga Iglesia sa buhing Dios, nga ginadayandayanan ang atong mga kaugalingon sa mga butang nga iya sa kalibutan, ug dayon maghitsura kaha kamong Asawa sa Balaang Tawo? Maghitsura ba kitang natural sa ingon nianang kahimtang?

²⁰³ Kung makakita kamo og usa ka tawo karon, gitooan ingon nga usa ka balaang tawo; ug ania nagaabot ang iyang asawa, nga sama didto sa unang ginang, nadayandayanan niadtong pinaburot nga pagkahapsay sa buhok nga sama *niini*; ug mapula-pula kanang usa ka bahin niini, ug berde pud ang pikas bahin, ug—ug mora siya og napahiran diha sa baba og usa ka pang-id-id sa pintal; ug tanan sa niining kung unsa pa, nagalakaw diha sa dalan, nga mora na hinoong longganisa sa kahuot sa gisul-ob niini; ug ingon niana *kaayo* kahataas ang mga takong, nagapakiay-kiay pa gyud, nga nagalakaw diha sa dalan; ug dunay moingon, “Asawa kana siya sa usa ka balaang tawo?” Wala ako nagtiaw-tiaw. Ginapahayag ko lamang kana.

²⁰⁴ Mitambong ako kaniadto sa usa sa atong dagkung Pentecostal nga buluhaton, dinhi dili pa lang dugay. Nagpahiluna ako og usa ka tolda. Ug ang pastor miingon kanako, miingon, “Ang akong asawa mao'y organista.”

Miingon ko, “Maayo kana, igsoon.”

“Dili man siguro dautan kung siya ang motugtog?”

Miingon ko, “Dili. Dili man, sir. Siguradong dili ko mo mobalibad.”

²⁰⁵ Ug giadtoan niya ang tag-dumala. Miingon ang tag-dumala, si Igsoong Baxter, nag-ingon, “Okey lang man.”

²⁰⁶ Miingon siya, “Igsoong Branham, anhi ka. Gusto kong mahimamat mo ang akong asawa.” Ug miadto ako didto.

²⁰⁷ Pasayloa ako ninyo. Kita n’yo? Dili ko gustong, mohimo og—og komentaryo. Aduna lang ko’y gustong ipahayag. Kita n’yo?

²⁰⁸ Ug kadtong babaye nakamanikyur pud niini. Ambot lang unsay tawag niadto. Sa niadtong butanga, kabalo na mo, nagsaksak-sinagol ang kolor, ug wala pa ko nakakita og ingon niadto sa tibuok kong kinabuhi; ug kadtong bisti niya hangtud na *dinhi*, walay tabon sa likod, ug halos walay pang-ilalum. Ug wala pa ko—ako sukad nakakita og ingon niadto sa akong kinabuhi. Ug dagku kaayo ang iyang mga aritos nga nagbitay nga sama *niana*, ug daghan pa kaayong ingon-anang mga butang.

²⁰⁹ Ug naglantaw-lantaw ako. Nahunahuna ko, “Oh, agoy!” Usa ako ka Baptist, ug duna ko’y mas may nahibaloan pa kay niana. Naglantaw-lantaw ako pag-usab. Miingon ko . . .

²¹⁰ Karon, hangyo ko lang, dili kini tiaw-tiaw. Apan kinahanglan kong isulti kadto sa maong igsoon, ug naglaum ako nga nakatabang kadto kaniya. Wala ko ginasulti kadto aron maingon nga lahi gyud ko; kung ingon niana man, usa ako ka tigpakaaron-ingnon, kita n’yo, nga kinahanglan pud mahinloan, ako mismo.

Miingon ko, “Mister, dili ba ingon mo nga balaan ang imong asawa?”

Miingon, “Oh, oo.”

²¹¹ Miingon ko, “Mora’g dili man, sa tan-aw ko.” Miingon ko, “Wala pa ako—ako nakakita og ingon niana sa tibuok kong kinabuhi, ilabina og asawa sa usa ka ministro. Daw sa dili man asawa sa usa ka balaang tawo ang hitsura.”

²¹² Ug bisan gani ang iglesia sa buhi nga Dios, nga humilig na sa iyang urog nga binistihan, sa iyang mga tea parties, ug mga bunco parties, ug pang-baraha nga mga dula, ug mga pagdisko-disko, ug pang-sosyalan, gidayandayanan ang kaugalingon sa ingon niana, pareho sa kalibutan, aba dili ingon niana ang hitsura sa Pangasaw-onon sa Balaang Dios. Sa dihang manigarilyo gyud siya, ug magdiskodisko, ug magparty-party, ug may pangsosyalan pa nga panihapon, ug pang-sosyalan nga pag-inum-inum, ug tanan na nga ingon niana, aba mosulti pa nga Pangasaw-onon kono sila ni Cristo? Dili man ingon niana ang hitsura sa Asawa sa usa ka Balaang Tawo, alang kanako. Dili, sir. Dili Siya mopili og ingon niana nga babaye. Mokuha Siya og usa ka babayeng tarung, pareho sa kung unsa

ang ginatinguha Niyang irepresentar. Nagatoo ako nga matuod kana. Medyo makapasakit lang.

213 Nagtaliwan na ang akong inahan nga nagdaku sa habagatan. Niadtong bata pa lang ako, ang aduna lang kami niadto . . . Wala gyud kami makaon niadto, halos, ug ang aduna lang kanamo niadto gisantes ug tinapay nga hinimo sa mais. Wala ko kabalo kung nahibaloan ba ninyo kung unsa ang mga niini o wala. Mao nga wala pud kami og . . . Walay magamit nga mantika ang inahan ko sa tibuok tuig, ug kadtong karaan na namong dakung kalha kinahanglan pa namong itungtong nga sama *niana*, ug aron pahilisan dinha og ayo ang panit sa karne. Magkaaduna lang kami niadto pag-adunay magutad, o adunay magahin ang mag-iihaw og panit aron ihatag kanamo. Ug gisahon namo kadto sa kalha, aron magmantika, ug ibubo kadto sa pagkaon.

214 Sa matag Sabado sa gabii, ginaingon ni mama nga kinahanglan namo konong moinum og gamay'ng castor oil. Ug dili ko—dili ko gyud maagwanta kana bisan hangtud sa karon. Ug kinahanglan kong moinum niadto. Moduol ako sa iya, nga ginapislit ko ang akong ilong nga sama *nini*. Miingon ko, “Mama, dili ko—dili ko gyud maagwanta kana.” Miingon ko, “Ga-kasukaon gyud ko og ayo niana.”

Miingon siya, “Kung dili kini makapasukaon kanimo, dili kini magahatag og kaayohan kanimo.”

215 Busa sa hunahuna ko ingon niana pud kini sa pagwali sa Ebanghelyo. Kung dili kini mouyog kaninyo og gamay sa inyong pagbati, nga himoon mong . . . palihokon sa husto ang inyong spiritual nga tiyan, pasakitan ang inyong pagbati og gamay, aron masusi n'yo ang inyong kaugalingon diha sa Biblia: masusi kanang pagkamainit sa ulo pirmi, ug ang pagkahakog, pagkadili-diosnon, pagkamahigugmaon sa kalibutan, telebisyon, ug kanang mga butang sa gabii; ug nagapasagad nga dili motambong sa panimbahon, ug mao nga walay sulod ang mga lingkoranan sa simbahan. Sa dihang, didto unta kamo nga nagatambong sama ni Jesus, kung anaa ang Iyang Espiritu sa sulod ninyo, nga nagapaningkamot unta nga madala ang tanang tawo sa nasud nga motambong sa inyong simbahan, aron madawat nila si Cristo. Ug dayon magpatawag sa atong mga kaugalingon nga Pangasaw-onon ni Cristo? Oh, makaloolooy ka gayud, higala!

216 Miabot na ang takna. “Ginaandam na sa Iyang Pangasaw-onon ang Iyang Kaugalingon.” Oh! “Ginaandam na ang Iyang Kaugalingon.” Ginapadaplin na Niya ang tanan niining mga butanga. Hinumdumi, si Ester ang napili, ug ang uban gisalikway. Ug kadto lamang mga natawo na pag-usab, ang adunay Espiritu sa Dios, ang mamahimong mga Pinili nianang Adlaw, nga ang purongpurong sa himaya igapurongpurong sa Iyang ulo. Ug ang uban igasalikway.

²¹⁷ Tugoti ninyo nga isugilon ko kaninyo ang usa ka butang nga nahitabo kaniadto. Ako—ako, usa ako ka misyonero, ingon sa inyong nahibaloan na, nga nagabuhat og pang-ebanghelyong, buluhaton nga pang-misyon, nga pito na ka higayon nga mitabok ako sa dagat, sa tibuok kalibutan. Dinhi, dili pa lang dugay, sa siyudad sa Roma, ang Roma usa ka inilang siyudad sa bahin sa art. Ug aduna sila’y tulonghaan didto bahin sa art ug ang uban sa atong kabatan-onang Amerikano nagaadto didto matag tuig, aron mokuha og usa o duha ka tuig nga pagtuon bahin sa art, aron makakat-on sa pagpintura og mga hulagway. Adunay usa ka grupo sa mga kabatan-onang Amerikano ang miadto didto, pipila na ka tuig ang milabay, sumala sa estorya nganhi kanako. Ug sa dihang didto na sila, nangagpatuyang sila nga mora’g mga baboy. Pagkaabot nila sa Roma, gibuhat nila kung unsa ang ginabuhat niadtong mga taga-Roma: manggawas ug mag-inum-inum, ug maghubohubo sa ilang kaugalingon, ug tanan nang uban pa, ug nanagpatuyang gyud, sila parehong mga lalaki ug babaye.

²¹⁸ Ug dihay usa ka tulonghaan didto. Ug sa niining tulonghaan, didto kining—kining grupo sa mga batan-ong Amerikano nanungha. Ug ang matag usa kanila didto, halos, mao ra sa gihapon ang ginabuhat. Apan dunay usa ka gamay’ng babaye didto, nga dili niya kadto gikauyonan, man lang. Nagpabilin lang siya sa iyang gisak-an. Pag-gabii, nagabasa lang siya samtang atua ang tanan sa gawas aron mag-inum-inum. Sa buntag, nagatrabaho siya, nagatuon. Bueno, gihimo siyang kataw-awan sa tibuok nga eskwelahan. Ug gipapabilin niya ang iyang kaugalingon ingon nga usa ka maligdong nga dalaga, nagalihok ingon nga usa ka gining. Bisan pa’g adunay mga bantan-ong Romano ug tanan na sa palibot, ang nagapugos kaniya nga manuroy, mingbalibad siya niini. Dili, sir. Mipabilin lang gyud siya alang sa iyang mga leksiyon, nagtuon kung unsaon mag-drowing, ug magpintura, diay. Ug padayon siyang nagpabilin dinha.

²¹⁹ Sa kaulahian, adunay usa ka tigulang nga tagbantay sa maong lugar ang nakabantay kaniya, namatikdan siya nga lahi gayud siya, bisan ang maong tagbantay usa ka Romano Katoliko, ginabantayan siya, kung unsa siya manglihok. Usa ka gabii, kining batan-ong babaye, gikan sa parke kon diin atua didto ang—ang bilding sa pagpintura, aba, o ang lugar kon diin atua didto ang iyang tulonghaan, migula kining gining sa maong eskwelahan, ug mipadulong ngadto sa ibabaw sa bungtod, ug pasalop na niadto ang adlaw. Ug nagtindog siya didto sa ibabaw, nga makita ang iyang maanyag, walay pintal nga nawong, ug nakabuhayhay ang iyang buhok, samtang nagalantaw siya ngadto sa tabok *niadtong* bahin kon diin didto nagasalop ang adlaw.

²²⁰ Nagakahig niadto ang tigulang nga tagbantay sa nataran. Padayon siyang nagalantaw sa maong babaye, samtang

nagakahig siya. Aduna sa kung unsa ang nag-aghat sa tagbantay, “Adtoi, estoryaha siya.” Busa gibutang niya ang pangkahig, gihukas ang daan niyang luyloy na nga kalo, misaka didto sa lugar diin atua ang batan-ong gining. Miingham siya. Napalingi ang gining. Miingon siya, “Pasayloa ko, gining.”

Miingon ang gining, “Oo, sir. Okey lang.”

²²¹ Ug namatikdan sa tagbantay nga nagahilak ang maong dalaga. Ang tanan nga ubang kabatan-onan atua na sa dakung kalingawan niadtong gabhiona. Miingon siya, “Madam, galaum ko nga masabtan mo lang ko unta sa hustong paagi, kay gusto ko lang makigsulti kanimo.” Miingon, “Sige lagi ka dinhi, halos magduha ka na tuig karon. Ug namatikdan ko nga kanang grupo nga kadungan mong nanganhi, atua sila kanunay sa mga kalingawan, ug gabii na kaayo sila gapanguli, og hubog pa, ug halos hubo na, ug kung unsa pa. Apan namatikdan kong wala ka nagauban sa ingon nianang mga kalingawan.” Ug miingon pa, “Akong—namatikdan ko gyud, nga daw sa, kanunay kang nagalantaw ngadto sa tabok dagat. Sa magabii na, nagaanhi ka dinhi, ug nagatindog dinhi sa matag gabii, ug nagalantaw sa adlaw nga nagasalop.” Ug miingon, “Unsay, unsay hinungdan?” Miingon pa, “Tigulang na ako. Ug gusto ko—ko ubang mahibaloan kung unsa ang hinungdan ug lahi man ka sa ubang kabatan-onan.”

²²² Miingon ang dalaga, “Oo, sir.” Miingon siya, “Sir, nagalantaw ako paingon sa among lugar sa dihang ang adlaw nagasalop.” Miingon siya, “Didto man gud, sa unahan nianang adlaw atua didto ang akong yutang natawhan.” Ug miingon siya, “Sa nianang nasud adunay probinsiya. Ug sa nianang probinsiya adunay usa ka siyudad. Ug sa nianang siyudad adunay usa ka balay. Ug sa nianang balay adunay usa ka lalaki.” Miingon pa, “Siya, pud, usa ka pintor. Ug niadtong minggikan ako, aron moanhi dinhi, gipanumpaang ko ang akong gugma ngadto kaniya. Nagkaaduna na kami og pagsaad-sa-pagminyo sa usa’g usa.”

²²³ Ug miingon siya, “Mao nga bisan unsa pa ang buhaton sa uban, wala na kana’y sapayan kanako.” Miingon siya, “Nagsaad ako nga magkinabuhiing matinud-anon ug husto.” Ug miingon siya, “Nagapangandoy ako alang nianang adlaw nga mabati kong anaa na ako nagasakay sa ibabaw sa mga pako sa dakung eroplano nga maoy magdala kanako patabok nianang dagat ug magapatugpa kanako sa tugpahanan kon diin tagboon ako sa akong hinigugma. Nagapatindog siya karon og usa ka panimalay, ug magkinabuhi kaming magkauban nianang yutaa.”

²²⁴ Ug miingon, “Mao kana ang hinungdan kon nganong nagalihok ako nga ingon niini. Matinud-anon ako sa saad nga akong gisaad sa maong batan-on. Ug siya man pud matinud-anon sa saad nga gisaad niya kanako.” Miingon, “Makabalita

ako gikan kaniya, sa matag karon ug unya, ug nagasulat ako kaniya, ug,” miingon pa, “nagsinulatay kami sa usa’g usa. Padayon kaming nanghawid sa among mga panumpa, nagapaabot alang sa adlaw nga kami magkitaay.”

²²⁵ Oh, tukma kaayo kini para sa usa ka matuod nga Cristohanon, ang magpahilayo gikan sa mga butang nga iya sa kalibutan. Ug moabot ang adlaw, ang gikahinaman ninyong pagtugpa sa tugpahanan, diha sa mga pako sa Salampati! Magaanhi Siya alang sa usa ka Pangasaw-onon, nga wala nakighugoyhugoy sa kalibutan o sa mga butang nga iya sa kalibutan. Nahugasan siya sa Dugo sa Cordero. Iyang gipanumpa ang Iyang—Iyang gugma alang sa Iyang Hinigugma lamang. Ang gugma para sa kalibutan wala na ug patay na diha Kaniya. “Moabot na ang kasal sa Cordero, ug ginaandam na sa Iyang Pangasaw-onon ang Iyang Kaugalingon.”

Pamalandungon nato kini samtang iduko nato ang atong mga ulo sa kadali.

²²⁶ Sa umalabot nga adlaw, samtang ginalantaw ko ang pagsalop sa adlaw, ako man pud, trayntay-uno na ka tuig ang milabay, nanumpa usab ngadto sa Usa nga akong gihigugma, gipanumpa ang tanan kong gugma ngadto lang Kaniya. Kanunay kong gipaningkamotan nga manggunit og ayo Kaniya ug sa Iyang Pulong, kung asa man ako moadto. Nahibalo ko nga daghan pa sa uban ang nagalingkod dinhi, nga ingon niana pud, nagapaabot alang nianang adlaw sa dihang modunggo na sa dunggoanan ang karaang barko sa Zion, kuhaon ang atong mga kalag ug dalhon kita ngadto sa Presensya Niya Nga atong gihigugma ug gisaaran sa atong gugma.

²²⁷ Mahimong aduna og pipila nga ania karong gabhiona, nga wala pa sukad nakahimo og maong panumpa. Tingali aduna pud og pipila nga nakapanumpa na kaniadto ug wala kini gituman. Kung sa ingon niana ka nga kahimtang karong gabhiona, higala, nganong dili man nimong sulayan na mobalik karong gabhiona, ug isaad usab ang maong saad? Kung wala mo pa nabuhat, buhata kini. Nganong dili ka moduol ug buhaton kini niining gabhiona? Ingnon mo, “Ginoong Jesus, gihigugma ko Ikaw.”

²²⁸ Hinumdumi, kung nakapanumpa ka na, ug nakasagol pa sa gihapon ang mga butang nga iya sa kalibutan, dili gyud mahimong magkaaduna si Jesus og ingon nianang klaseng pangasaw-onon. Ayaw Niya sa usa ka mananapaw. Ang tanan nga gugma mo kinahanglan nga sa Iya lamang. Ug kon ginahigugma gani nimo ang mga butang nga iya sa kalibutan, ug ang mga urog sa niining kalibutan, labaw pa kay sa imong paghigugma sa Dios, kung ingon niana wala mo ginaandam ang imong kaugalingon.

²²⁹ Aduna ba’y tawong ingon niana dinhi karong gabhiona, samtang nagaduko kita sa atong mga ulo, nga gusto niyang

magtaas og kamot, moingon, “Igsoong Branham, iampo ako. Gusto kong mamahimong ingon niana. Gusto kong—kong mahimong kabahin sa Pangasaw-onon. Ug ako nahibalo nga nakabuhat ako sa mga butang nga dili angay buhaton. Iampo mo ako?” Panalanginan ka sa Dios, akong igsoong babayeng Indian. Panalanginan ka sa Dios, igsoon. Ug ikaw, igsoong lalaki. Ug ikaw, igsoon. Aduna pa ba? Ipataas ang inyong kamot, ingna, “Iampo ako, Igsoong Branham. Akong—akong—akong—akong nahibaloan nga nasayup gyud ako.”

²³⁰ Karon himoang magmatinuuron sa kaugalingon. Lingia-og-lantawa ninyo ang inyong kinabuhi. Kinahanglan nga lingion-og-lantawon ninyo sa dili pa kamo mopadayon sa unahan. Lantawa ninyo balik kung naunsa na kamo. Lantawa kung unsa na’y napabuhat kaninyo sa espiritu nga anaa kaninyo. Kung dili kamo. . . Kung nag-angkon kamo nga usa ka Cristohanon, ug nagauban-uban sa gihapon sa mga butang nga iya sa kalibutan, igsoong lalaki, igsoong babaye, kamo wala na’y lain kondili mga buta kung dili ninyo makita nga sayup kamo?

²³¹ Adunay nagsulti kanako niadtong usa ka adlaw, miingon, “Igsoong Branham, pasagdan mo na lang siguro nga ingon niana ang mga tawo.” Miingon pa, “Ginatawag ka ra ba sa mga tawo nga propeta.”

Miingon ko, “Dili ako propeta.”

²³² Miingon, “Pero nagahunahuna ang mga tawo nga propeta ka. Ang angay mong buhaton nga tudloan mo na lang sila nga mga kababayen-an. Imbis unta nga sultihan mo sila nga magpataas og buhok ug magsul-ob sa hustong bisti ug mga ingon nianang butang, sultihan mo na lang sila unta kung unsaon sa pagdawat sa mga butang nga espirituhanon.”

²³³ Miingon ko, “Unsaon ko pagtudlo kanila sa algebra, nga dili man nila tun-an ang ABC, sa kinder? Wala man lang gani sila og hustong batasan aron hinloan ang ilang mga kaugalingon, mga nagpatawag pa hinoon nga, ‘Pangasaw-onon ni Cristo!’” Wala ko kana ginapamulong nga may pagkamasuk-anon. Ginapamulong ko kana nga may pagka-diosnong gugma.

²³⁴ Maingon sa giingon ko kaganinang buntag, kung nakita ko kamo didto sa suba sakay sa usa ka bangka, ug nakita ko nga paderetso kamong pahulog sa busay, nga dili na malikayan sa bangka, singgitan ko kamo ug siyagitan ko kamo, pero dili buot ipasabot nga gusto kong pasakitan ang inyong pagbati. Gimahal ko kamo. Tungod nga, kung dili ko buhaton kana, malaglag ang inyong kinabuhi.

²³⁵ Aduna pa ba dinha, nga magpataas sa ilang mga kamot sa dili pa kita mag-ampo? Nakita ko ikaw, dinha sa luyo. Panalanginan ka sa Dios, ug ikaw, ikaw. Nahibalo kamo nga ginapakita sa inyong kinabuhi nga sayup kamo. Sa gihapon gimahal ninyo ang kalibutan labaw pa kaysa Dios, kung ingon-

ana aduna gyú'y sayup sa kung asa man. Susiha ang inyong kaugalingon. Dinha dapit, ipataas ang inyong kamot, ingna, "Iampo ako, Igsoong Branham." Panalanginan ka sa Dios. Ang Dios... Husto kana. Sa tinud-anay lang, akong—akong ginadayeg ang pagkasinsero.

²³⁶ Mao kana ang problema sa iglesiang Pentecostal karon. Wala na kanato ang matuod nga pagkasinsero nga aduna kita kaniadto. Wala na kanato ang kaisog aron—aron moduol ug isulti kana, dawaton nga sayup kita. Nakatapat na og ayo ang yawa sa iglesia hangtud nga naglunang na kini diha sa hugaw sa kalibutan. Ayaw ninyo buhata kana.

²³⁷ Ang inyong kinabuhi mismo nagapamatuod nga wala kaninyo kung unsa ang ginasulti ninyo nga aduna kamo. Nan nganong dili man ninyo ipahayag kini? "Ang nagasugid sa iyang sala makabaton sa kapasayloan: ang nagatago sa iyang sala dili mouswag" Dili mo maitago kini. Nasayod ang Dios bahin sa tanan niini. Ug kung nakita ninyo ug nahibaloan ninyo nga wala kamo magkinabuhi og matarung, nan nganong dili man ninyo kini ipahayag, ug ibutyag ug mahinloan kini?

²³⁸ "Adunay mga tawo nga ang ilang mga kasal-anan nabutyag na una kay kanila; ang sa uban pabutyag pa lang." Hinaut nga ang sa ako nabutyag na. Igabutyag ko ang tanan kong mga kasal-anan karon. Hinaut nga tul-iron kini sa Dios. Ingon niana ang kinahanglan natong buhaton.

²³⁹ Aduna og unom o walo ka mga kamot ang gipataas. Nakasiguro kong adunay mas daghan pa niana alang sa niining gamay'ng iglesia, karong gabhiona, nga dunay usa ka gatus o duha ka mga tawong mitambong, o tingali usa ka gatus ug singkwenta. Panalanginan ka sa Dios, batan-ong lalaki. Karon, panalanginan ka sa Dios, gining. Panalanginan ka sa Dios, igsoong babaye. Husto kana. Panalanginan ka sa Dios, anak. Maayo kana.

²⁴⁰ [Blangkong bahin sa teyp—Ed.]...-costal nga kababayenan kaniadto wala nagpapatol sa ilang buhok, apan karon ginabuhat na nila. Unsa'y nahitabo karon? Kaniadto wala sila... nagnusnos—nagnusnos og meyk-ap. Wala kana buhata sa inyong inahan, kung pentecostal siya. Unsay nahitabo karon? Tungod kay nagsige na sila'g ubog sa lunang sa kalibutan. Ug ginalantaw kita sa kalibutan. Nag-angkon kita nga usa ka balaang Iglesia. Unsay nahitabo? Dili na kita ang hitsura sa Pangasaw-onon ni Cristo. Sa mga kalalaken-an dinha, ingon niana usab kamo. Igsoon, makauulaw ka.

²⁴¹ Langitnong Amahan, sa dihang nagalantaw kami sa palibot, ug nagapahigayon og usa ka pagpaduol sa altar, nagapamadlong, gapanglampornas, medyo og mabagis. Apan sa kinasuloran ko nagadugo, sa dihang nahibalo ako nga pahaduol na kami sa katapusan. Kining gagmay'ng bangka mangahagsa

na, usa sa niining mga adlaw. Moabot ang kamatayon, ug ang mga pagpinal. Ug pila na ka higayon akong gitawag nga tuparan sila sa ilang kiliran, ug madungog silang nagaingon, “Oh, Igsoong Branham, kung mahimo ko lang untang mabuhi pa pag-usab.” Samtang, ania pa kining mga makahimo pa, Ginoo, itul-id gyud nila kini!

²⁴² Nagapaningkamot ako kutob sa akong mahimo. Dios, ipadayag unta kini sa Balaang Espiritu ngadto sa mga tawo, nga nagapaningkamot lamang ako aron tabangan sila, dili nga aron pangkasab-an sila. Kondili, sama sa giingon ni Pablo, kaniadto! Dios, dili ko gustong masakitan sila, apan kinahanglan ko silang pasakitan og igo aron makita nila kung asa sila nasayup.

²⁴³ Nagaampo ako nga Imong itugot, karong gabhiona, sa niining mga tawo, nga nagapataas sa ilang mga kamot, uban—uban ang bug-os nga pagpaubos aron—aron angkonon, sa atubangan sa Dios, nga nangasayup sila, ug gusto nilang itul-id kini. “Pangita, ug kamo makakaplag. Pagtuktok, kini pagaablihan.” Apan kung wala kamo nanuktok, unsaon man pud Niya sa pag-abli? Wala kamo mangita, unsaon pud ninyo sa pagkakaplag?

²⁴⁴ Itugot unta sa Balaang Espiritu, Ginoo, nga dalhon kining mga tawo ngadto sa usa ka bug-os nga pagsurender sa Dios, karong gabhiona. Hinaut ang halangdong Amahan sa among Ginoong Jesus Cristo magahinlo kanila, kalag, lawas, ug espiritu, ug ibutang sila ngadto sa Lawas ni Ginoong Jesus Cristo. “Tungod kay ang kasal sa Cordero haduol na, ug ginaandam na sa Iyang Pangasaw-onon ang Iyang Kaugalingon.” Oh Ginoo, hinaut unta nga kini na ang gabii sa pagpangandam, tungod nga mahimong ugma na ang adlaw nga kami makigtagbo Kanim. Itugot kini, Ginoo.

²⁴⁵ Karon samtang nagaampo ako, ug ginaduko ang iyong mga ulo. Ang matag usa kaninyo nga nagpataas sa inyong kamot, kung bug-os ka sinsero kamo nianang butanga, ug tinuoray nga gusto ninyo gyud kana, ug wala kamo naulaw nga ipahibalo sa mga tawo nga nangasayup kamo! Mangatubang man pud kamo nga kauban kanila didto sa Paghukom, sa gihapon. Ug nagbutang ang Dios sa sulod ninyo og igong konbiksyon, aron maamgo ninyo nga kamo nasayup.

²⁴⁶ Usa ka panahon dinhi dili pa lang dugay, nagawali ako niadto bahin sa mga ingon nianang butang. Naestorya ko ang usa sa batan-ong gining nga nagatindog didto sa luyo. Makapanlimbawot ang iyang hitsura, anak nga babaye pa gyud sa ministro. Ug gitagbo niya ako didto sa gawas sa simbahan, ug walay pugongpugong niya akong gisinghagan! Miingon siya, “Ikaw nga burong.” Gamayon, walay-tahod, pininturahan ang ngabil; mubo’g, pinutlan ang buhok. Miingon siya, “Kung gustohon ko man nga adunay makig-estorya kanako

bahin nianang butanga, mokuha ko'g tawong adunay maayong pangisip.” Miingon pa, “Ayaw na gayud buhata nga mobalik ka pa sa pulpito sa akong amahan ug magwali utro sa ingon nianang butang.”

²⁴⁷ Miingon ko, “Buot mo bang ipasabot kanako, ang imong papa, nga usa ka buotan matinud-anong magwawaling Baptist sumala sa akong pagkaila kaniya, ug dili man lang siya mowali batok niana?”

Miingon siya, “Wala ka niya suholi aron moanhi . . .”

Ingon ko, “Wala man niya ako suholi, wala gyud. Mianhi ako tungod sa inbitasyon.”

Miingon siya, “Dili ko gayud ikaw mapasaylo tungod niana.”

²⁴⁸ Miingon ko, “Anaa ra kana kanimo. Nagsunod lamang ako sa Ebanghelyo.” Midapat ang hangin sa iyang mapula-pulang aping. Maanyag ra ba unta nga batan-ong babaye.

²⁴⁹ Sa paglabay sa pipila ka panahon, mga usa ka tuig ang milabay, nakaagi ako didto sa siyudad. Nakita ko ang maong batan-ong babaye nga nakapalda'g mubo, nga nanigarilyo, nga naglakaw didto sa dalan. Nahunahuna ko, “Hala asawa siguro kana ni Igsoong *Ingon nini-o-ingon niana*, asawa, o, anak niya nga babaye.” Mitabok ako didto sa dalan, para tan-awon kung matagbo ko ba siya.

²⁵⁰ Mitan-aw siya sa ako, nga nanigarilyo, migawas ang aso sa iyang ilong. Miingon siya, “Kumusta ka, magwawali,” nga daw sa walay pagrespeto, mora og ingon niana.

Miingon ko, “Bueno, maayo man!”

Miingon, “Pagyupyup usá sa sigarilyo ko. Pagpakalalaki pud ba.”

Miingon, “Wala ka ba maulaw sa imong kaugalingon?”

²⁵¹ Mikuha siya niadto og iyang pitaka, miingon, “Kung ingon niana ania ang sigarilyo.”

²⁵² Miingon ko, “Makauulaw ka. Pagbaton og kaulaw, nga tunolan mo ang usa ka alagad sa Dios og sigarilyo.”

Miingon siya, “Kon dili ka pag-inum na lang og bino sa akong botelya.”

Miingon ko, “Palihug ayaw na pagsulti niana.”

²⁵³ Gitan-aw ko siya. Dili ko mapugngan nga maluhaluha, tungod nga ang iyang papa usa ka buotang tawo. Gitan-aw ko siya. Sa hunahuna ko, “Oh, makalooloy! Abe niya og taas pa ang iyang panahon.”

²⁵⁴ Hinayhinay akong milakaw. Dili ko mapugngan ang luha sa akong mga mata. Palakaw na ako. Miingon siya, “Kadali lang.”

Miingon ko, “Oo, gining?”

255 Misunod siya. Halos makauulaw ang makig-estorya kaniya didto sa kalye, samtang nagapangagi ang daghang mga tawo. Miduol siya. Ingon niya, “Nahinumduman mo pa ba kadtung giingon mo kanako niadtong gabhiona?”

Miingon ko, “Kanunay kong mahinumduman.”

256 Miingon, “Gusto kong isulti kanimo, pastor, husto ka.” Miingon siya, “Gipasubo ko ang Balaang Espiritu sa katapusang higayon.” Karon, mao ni ang gisulti kanako sa maong babaye, ug dili ko gyud kini malimtan, samtang buhi pa ako. Ingon niya, “Nakigsulti ang Dios kanako niadtong gabhiona. Apan,” miingon pa, “niadtong gisalikway ko Siya dadtung panahona, katapusan ko na diay kadto nga higayon.” Miingon, “Sukad niadto migahi na ang akong kasingkasing; wala na akong pagpakabana alang sa Dios, sa simbahan, o sa unsa pa man. Ginabalikas ko na si papa, adlaw-adlaw.” Ug miingon siya, “Matan-aw ko nga ang kalag ni mama nga ginaprito didto sa impiyerno, nga mora og maruya, ug gikataw-an ko lang.” Gipasubo niya ang Balaang Espiritu sa katapusang higayon. Pamalandunga kana ninyo.

257 Mamauli na kita sa atong Balay sakay sa mga pako sa Salampati. Tinguhaon nato nga mahimong usa ka Pangasaw-onon. Karon manindog kamo gikan sa inyong lingkoranan, kung nasayup man kamo. Duol ngari. Pagtindog dinhi duol sa altar ug ingna, “Nasayup gayud ako. Igsoong Branham, kanunay mainit ang akong ulo. O, ako—ako—nagkinabuhi ako nga dili-diosnon. Ako—dili ko angay’ng buhaton kining mga butang nga akong ginapangbuhat. Igsoong Branham, nangabuhat ko ang *kini, kana, o ang uban pa*. Nakasala ko sa pagpamakak. Nakasala pud ko sa pagpangawat. Nakasala ako sa kung unsang butang. Wala na gialagaran ang Dios sa paaging angay kong buhaton, ug gikaulaw ko ang akong kaugalingon, ug gusto kong itul-id ang akong kinabuhi. Mahimo mo ba akong iampo dinhi karong gabhiona, Igsoong Branham?” Ikalipay kong buhaton kana.

258 Kung ginatubag sa Dios ang akong mga pag-ampo, para patalinghugan ang pagpangamuyo para sa mga may balatian, sa mga buta, ug sa mga nag-antos, siguradong patalinghugan pud Niya ang pagpangamuyo sa usa ka makasasala. Mahimo bang moduol kamo ug aron mamahimong kabahin sa Pangasaw-onon karong gabhiona? Ginadapit ko kamo nga moduol.

259 Salamat, akong igsoon. Ginadayeg ko kanang ingon nianang matang sa kaisog, nga ibutyag mo ug angkonon nga sayup ka. Panalanginan ka sa Dios, igsoon. Tindog mismo *dinhi*.

260 Ang buot n’yo bang ipasabut, ginapataas n’yo ang inyong kamot pero dili man lang kamo sinsero? Unsa na man ang nahitabo sa mga tawo? Igsoon, unsa na man ang nahitabo? Unsa na man ang nahitabo sa atong mga katawhan niining panahona? Ang buot n’yo bang ipasabut nga ipataas n’yo lang ang inyong

kamot, ginaangkon nga sayup kamo, pero dili man lang kamo moduol? Ug hibaloa, “Siya nga nasayod unsay matarung nga pagabuhaton, ug wala niya kini buhata, dautan kana para sa Dios.” Mahimo ba kamong moduol na?

Samtang ang piyanista, kung mahimo mo, igsoong babayeng, organist, duyogan mo kami og mahinay lang nga tukar.

²⁶¹ Ginadapit ko kamo. Gusto ko kamong pangutan-on. Pila man sa mga ania karon nga mga mananambong ang nakatambong na niining mga panagtigum kon diin. . . Nahibalo kamo nga dili ako usa ka magwawali. Wala ako’y edukasyon.

²⁶² Panalanginan ka sa Dios, gamay’ng gining. Nagkinahanglan kana og usa ka matuod nga babaye aron buhaton kana. Kining batang mang-aawit nga nagapadulong dinhi, panalanginan ka, akong igsoong babaye. Ingon niana ang matuod nga kaisog. Akong—ginadayeg ko kanang batan-ong gining. Panalanginan ka sa Dios, pinangga. Aduna ko’y batang babaye didto sa balay, kaedad-mo halos, ang anak kong si Rebekah. Gidayeg ko ikaw. Batang babayeng Indian? Panalanginan ka sa Dios, pinangga, usa ka batang prinsesa. Ang Dios magauban kanimo, langga. Ikaw, igsoong babaye, ang Dios magauban kanimo. Ug magauban pud kanimo, igsoong babaye.

²⁶³ Karon, lantaw kamo dinhi. Kung ang mga batan-ong gining, gagmay pa nga mga batan-ong babaye, linghud pa ang panghunahuna; ug pagwali mo nangahiwahiwa sila og ayo, ug ania sila nagaduol dinhi, nasayran nila nga nasayup sila, nagatindog dinhi sa atubangan sa mga mananambong aron mangayo og pasaylo sa ilang mga kasal-anan. Sigurado, siguradong kamong mga hamtong na nga mga kababayen-an, dili ba kamo moduol pud? Duol ngari, ug ubani sila sa pagtindog *dinhi*.

. . . would I seek Thy face;
Heal my wounded, broken spirit.

Kantahon nato kini.

Save me by Thy grace.
Saviour, Saviour,
Hear . . .

²⁶⁴ Sigurado kong igo ang inyong pagka-sinsero aron mag-ampo og usa ka mapaubsanon nga pag-ampo. “Tawga ko, Ginoo, sulayan Mo ako, ug susiha kung aduna pa og unsa mang sayup sulod kanako.”

Do not pass me by.

Panalanginan ka sa Dios, pinanggang igsoong babaye.

²⁶⁵ Pila man nga ania niining panagtigum ang nagtindog kaganina ug nakasaksi, sa tunga sa mga mananambong, nga mga kababayen-an, kalalaken-an, ug tanan na, nga nanagduol kaganina niadtong nagatindog ako nga nagaampo alang sa mga

masakiton, ug nagsulti kanila ang Balaang Espiritu sa mga butang, bahin sa ilang mga kasal-anan ug ingon nianang mga butang, ug napadayag kadto? Pila man kaninyo ang nakasayod nga matuod kana? Wala gyu'y pagkapakyas. Ginasulti kanako sa Balaang Espiritu, sa mao rang Balaang Espiritu, nga adunay nagapaguol Kaniya dinhi karong gabhiona. Karon, kana'y MAO KANA ANG GINAINGON SA GINOO. Karon, tagbuon n'yo kaha kini dinhi, o Didto na.

²⁶⁶ Dili ako kanang klase sa tawong madala sa emosyon. Dili, sir. Nahibaloan ko mismo kung asa ako nagabarug, ug akong—naila ko ang Dios. Husto kana. Daghan kaninyo ang kinahanglan motindog dinhi mismo kung diin nagatindog kining mga batanong babaye. Karon, dili ba kamo moduol ngari? Ginadapit ko kamo. Dili ko kamo pugson. Nagasulti lang ako kaninyo.

²⁶⁷ Adunay nagsulti, “Wala pa ako'y nadungog sukad-sukad og usa ka pagpaduol sa altar kon diin namadlong ang usa ka ministro sa mga mananambong, bahin sa mga butang nga sama niana.”

²⁶⁸ Sa ingon niana nga paagi kini angay buhaton. Wala ka miduol tungod sa makapasubo og ayo nga estorya, bahin sa usa ka mamatay nang inahan o kung unsa man. Kana, nga nadala lang sa emosyon. Ang Pulong sa Dios ang inyong giduol. Wala kamo miduol tungod sa kung unsa man nga emosyon. Nagaduol kamo nga nagatoo nga Dios ang Dios, ug ania kamo sa hukmanang balay sa Dios. Ug nagaduol kamo, nga ginapakilooy ang inyong kahimtang.

²⁶⁹ Panalanginan ka sa Dios, akong igsoong lalaki, igsoon kong babaye. Gusto kong lamanohon kamo, sa pag-ingon nga ginadayeg ko ang inyong matinuuron nga konbiksyon. Batanong gining, ginadayeg ko ikaw. Panalanginan ka sa Dios. Hinaut nga ihatag Niya kaninyo kana nga maisogong Espiritu. Panalanginan ka, igsoon kong lalaki. Ang Dios magauban kanimo.

²⁷⁰ Sa makausa pa, dayon ato nang tapuson. mahimong matapos na gyud kini sa katapusang higayon, usab. Kita n'yo? Wala ako kabalo kung kanus-a. Hinaut unta nga dili pa. Pero mahimong kini na. Kita n'yo?

Saviour . . .

²⁷¹ Ari ka, igsoon kong babaye. Gusto kong lamanohon ang imong kamot, salamot. Ginadayeg ko kana nga pagtoo. Tinuod gyud kana nga pagtoo.

²⁷² Duol pud ngari, akong igsoong lalaki. Gusto kong lamanohon ka, mismo dinhi. Ginadayeg ko ang imong pagkasinero. Panalanginan ka sa Dios.

²⁷³ Ari ka. Panalanginan ka sa Dios. Ginadayeg ko ang imong pagkasinero, nga nagabarug alang sa . . .

. . . pass me by.
Saviour . . .

274 Sa unsa? “Miabot na ang kasal sa Cordero, ginaandam na sa Iyang Pangasaw-onon ang Iyang Kaugalingon.”

. . . humble cry;
While on . . .
Do not pass me by.

Sa unsa?

I'm trusting only in Thy merit,
Would I seek Thy face;
Heal my wounded, broken spirit (kon diin
gitigbas kini sa Pulong),
Save me by Thy grace.

Saviour, Saviour,
Hear my humble . . .
While on others Thou art calling,
Oh, do not pass me by.

275 Hinumdumi, ang Balaang Espiritu mao ang mitigbas sa inyong kasingkasing, ug nga miduol kamo dinhi. Pamalandunga ang maong mga bahin nga Iyang gitigbas, ug dili mahikalimtan kana sa maong tawo sa tibuok niyang kinabuhi. Kanunay nila kini nga mahinumduman. “Kon ang atong mga kasingkasing wala magasaway kanato.” Apan kung moduol kamo nga ginadani na kamo sa Pulong sa Dios, ug gipalagpas lang ninyo kini, dili ingon niana ang Binhi ni Abraham. Giampingan og ayo ni Abraham ang saad sa Dios sulod sa iyang kasingkasing, bisan og unsa pa ang moabot o mahitabo.

276 Ginadayeg ko ang tanan sa mga nagatindog dinhi sa palibot sa altar. Ang pangamuyo ko alang kaninyo, nga igahatag sa Dios ang tinguha sa inyong kasingkasing karong gabhiona, ug himoon kamong matuod nga balaang mga tawo.

277 Ang pipila sa niining mga kabatan-onan, dunay mga Indian, Spanish, Mexican, ania silang tanan nga nagatindog, mga tawong nag-angkon nga mga Cristohanon, tingali, sa daghang katuigan, apan nasabtan nilang sayup diay kana. Gusto nilang maitul-id. “Bulahan ang mga gigutom ug giuhaw tungod sa pagkamatarung, kay sila pagabusgon.” Mga pagahukman na unta, pero andam nga itul-id kini sa atubangan sa Dios, ngadto sa kalayo nga altar sa paghukom sa Dios.

278 Moabot gyud kamo sa ingon nianang punto, mga higala. Moabot gyud kamo sa ingon nianang punto, busa karon pa lang atubangon na ninyo kini dinhi. Ayaw na og hulata nga magbuntag pa. Mahimong karong gabii ka na mamatay, sa usa ka aksidente, sa pag-uli mo.

279 Dili pa lang dugay sa usa ka panagtigum, naghimo ako og pagpaduol sa altar, ug—ug nagtawag ako, mora og didto

kadto sa Ohio. Ug niadtong gabhiona, niadtong pagawas na ako sa bilding, ug bag-o lang ko nakagawas niadto sa mga kinse minutos. Aduna ko'y nadungog nga nagasinggit, sa daplin sa dalan. Mihunong ako, og giduolan nako. Usa ka aksidente sa sakyanan, nga nabangga ngadto sa usa pa. Ug aduna og ginang nga naligpit didto, nga gisawan, nakuha pa gani niadtong anak ang singsing niadtong ginang, gisawan og ayo siya. Namatay kadtong ginang. Ug naestorya pa kono gani niini ang iyang anak nga babaye, didto sa dalanon, samtang nagmaneho. Naabtan pa kono nila siya didto, ug gidala nila siya ospital. Ug pareho unta sila nga angay'ng moduol ngadto sa altar. Ug miingon ang anak nga babaye, "Si mama, ang katapusang pulong nga giingon niya kanako sa wala pa kadtong pagkabangga sa sakyanan, 'nasayup ako niining gabhiona. Nasayod kong sayup gyud ko.'" Ug didto nabugtoan na siya sa gininhawa.

Oh, moingon kamo, "Dili kana mahitabo kanako." Pero puede gyud. Puedeng mahitabo pud kanimo.

²⁸⁰ Ug unsa kaha kung dili ka na gyud kondenahon pa sa Balaang Espiritu ug isulti kanimo nga nasayup ka? Dayon mosulod ka ngadto sa Eternidad nga ingon niana. Ug nasayod ka, nga sa nianang matang nga espiritu, dili gyud ka makasulod. Sir, tan-awa'g-balik ang imong kinabuhi, susiha kung giunsa mong pagkinabuhi. Ug tan-awa'g-balik didto ug susiha kung anaa ba kanang malumo, mapaubsanong kinabuhi ni Cristo, nga mitukma sa tanan Niyang Pulong. Kung dili man, nan pagduol og itul-id kini mismo. Adunay . . . Aba, nganong ibaylo mo man, kung ania na ang kalangitan nga puno sa mga matuod nga panalanging pentecostal nga maoy mohinlo sa imong kasingkasing, nga magaputli sa imong kalag? Dili ba kana husto?

²⁸¹ Pila man ang mga ministro nga ania dinhi niining gabhiona? Gusto ko nga ang pipila kaninyong mga igsoon moanhi dinhi ug ubanan kami. Kana lang, igsoon? Oo. Ari mo, mahimo ba ninyo, sa kadali, mga igsoon? Husto kana.

²⁸² Miingon si Jesus, sa Iyang Pulong, "Ang nagapatalinghug sa Akong mga Pulong, ug nagatoo Kaniya nga nagpadala Kanako, adunay Kinabuhi nga Walay Katapusan; dili na gayud mahiadto sa pagkahinukman, hinonoo nabalhin na gayud gikan sa kamatayon ngadto sa Kinabuhi." Miingon ang San Juan 6, "Ug pagabanhawon Ko siya sa kaulahiing adlaw," usa ka pagkabanhaw.

²⁸³ Mga igsoon, atong, kinahanglan natong barugan kana. Kinahanglan natong buhaton kana. Kinahanglan gyud nga mabuhay kana. Mao nga . . . Dili nga emosyon lang. Aduna kini og kauban nga emosyon, siyempre. Husto kana. Pero ang pinakamahinungdanon niini, mao ang usa ka hinalad gayud nga kasingkasing.

²⁸⁴ Dawata lang ang Pulong sa Dios, ug ingna, “Dios, nasayup ako. Pasayloa ko nga nabuhat ko kadto. Nahibalo ka sa akong kasingkasing. Nasayup ako. Dinhi mismong dapita, ginapahayag ko ang akong sayup. Ug sugod niining gabhiona, ug sa mga sunod pa, minyoonon na ako Kanimo. Kabahin na ako sa Pangasaw-onon. Dili ko na buhaton *kadto* pag-usab; dili ko na pasagdan nga magpatigbabaw pag-usab ang kainit sa akong ulo. Ako—ako magapanglihok na ingon nga usa ka gining. Ako magapanglihok na ingon nga usa ka buutan nga lalaki. Buhaton ko na ang mga butang nga gisulti sa Biblia nga angay buhaton. Magasalig ako Kanimo mismo karon diha sa Imong Pulong.” Kung ingon niana aduna ka na’y kapaingnan.

²⁸⁵ Nagatoo ba kamo niana, mga magwawali sa Ebanghelyo? [Nagaingon ang mga ministro, “Amen.”—Ed.] Kamatuoran ba kana? [“Amen.”] Husto kana.

²⁸⁶ Karon, iduko nato ang atong mga ulo aron sa pag-ampo karon, ang matag usa, sa kaugalingon ninyong pagpangamuyo.

²⁸⁷ Hinumdumi ninyo, anaa mismo sa inyong kiliran si Cristo. Sa unahan ninyo pud, dinhi sa altar, ania nagatindog ang mga Cristohanong nanagpangamuyo. Sa luyo ninyo; mga ministro sa Ebanghelyo nga nagapangamuyo. Karon, ginapahimutang kamo niana ilalum sa espiritu sa pagpangamuyo.

²⁸⁸ Karon, ang inyong pagpahayag, sa inyong mga kasingkasing, diha sa kaugalingon ninyong pagpangamuyo. “Ginoo, nasayup ako.” [Nagaingon ang kadtong mga atua sa altar, “Ginoo, nasayup ako.”—Ed.] “Pasayloa ako, Ginoo,” [“Pasayloa ako, Ginoo,”] “Nga nabuhat ko kining mga butang.” [“Nga nabuhat ko kining mga butang.”] “Akong ginapahayag karon ang akong kasal-anan.” [“Akong ginapahayag karon ang akong kasal-anan.”] “Nagatoo na ako Kanimo.” [“Nagatoo na ako Kanimo.”] “Ginadawat ko na Ikaw.” [“Ginadawat ko na Ikaw.”] “Gusto kong mamahimong kabahin sa Pangasaw-onon.” [“Gusto kong mamahimong kabahin sa Pangasaw-onon.”] “Sa Ngalan ni Jesus nagaampo ako.” [“Sa Ngalan ni Jesus nagaampo ako.”] Karon, tipigi ang inyong pamahayag sa sulod sa inyong kasingkasing karon.

Karon mangamuyo ako alang kaninyo.

²⁸⁹ Langitnong Amahan, masakit kaayo kanako pagmakita ko usahay ang mga tawong nagmahal kanako, ug makita kung ginaunsa Mo ang pagdala sa Pulong ug kung ginaunsa Mo Kini ginalatag. Bug-os Kining nagapanghiwa hangtud sa gitagboan sa mga utok sa bukog, apan pagkahuman niana nagaabot Ka mismo aron panghimatud-an kini nga kini mao’y Kamatuoran. Kini mao ang Kamatuoran.

²⁹⁰ Ania nagatindog ang mga kalalaken-an ug kababayen-an, mga batan-ong dalaga pa ang uban, mga batang babaye nga nagatindog dinhi nga nagduko ang mga ulo, ug may mga luha

diha sa ilang mga mata, diha sa mismong kinasang-an nga dalan sa ilang kinabuhi. Nahunahuna ko nga kung wala sila dinhi napaingon unta sila, didto sa mga pagsayaw-sayaw, mga rock-and-roll, mga giyawaan, giharian sa demonyo nga mga grupo. Ania sila, nagatindog dinhi karong gabhiona nga nanagduko ang mga kasingkasing, nga nanginahanglan og usa ka butang nga magunitan sa ilang mga kamot, aron maingon, “Ginoong Dios, hinloi ako gikan sa tanang mga butang nga iya sa kalibutan.”

²⁹¹ Ania ang mga kalalaken-an diha sa ilang tunga-tungang pangidaron, batan-ong mga kalalaken-an, edaran nang mga kababayan-an, batan-ong mga kababayan-an, nga dungan tanang nagatindog. Nagapahayag nga aduna sila’y sayup. Nakigsulti Ka sa ilang kasingkasing; kung wala man wala unta sila dinhi. Ginapakita lang niini nga dili sila makatindog gikan sa ilang mga lingkuranan, kung wala una ang pagdesisyon. Usa ka Espiritu sa Dios ang nagpalibot kanila, ug—ug miingon, “Nasayup ka.”

Ug ang ilang makaloolooy’ng kinabuhi miingon, “Gino, kung ingon niana akong gikinahanglan Ka.”

Ug miingon ang yawa, “Pabilin ka lang sa paglingkod.”

²⁹² Apan miingon ang Espiritu sa Dios, “Tindog.” Ug naglakaw sila diha sa pagkamasinugtanon, ug ania karon nagatindog dinhi palibot sa altar.

²⁹³ Karon, maingon sa gikutlo ko Kanimong nga Imong Pulong, “Siya nga nagaduol Kanako, dili Ko gayud igasalikway. Bisan pa ang inyong mga sala mapula, sila pagapapution sama sa nieve; lubos man ka mapula, mahimong sama sa maputing balhibo sa carnero. Ari ka ug magpalit Kanako, og bino ug lana. Ang Akong gracia igo alang kanimo. Ang nagapatalinghug sa Akong mga Pulong, ug nagatoo Kaniya nga nagpadala Kanako, may Kinabuhi nga walay katapusan; ug dili na pagahukman, hinonoa nabalhin na gikan sa kamatayon ngadto sa Kinabuhi. Ug karon moabot na ang kasal sa Cordero, ug ginaandam na sa Pangasaw-onon ang Iyang Kaugalingon.”

²⁹⁴ Amahan, Imoha sila. Sila ang mga tropeo sa Imong Pulong. Ania sila aron mahugasan sa tubig sa Pulong, tungod nga kini ang kinatibuk-ang Ebanghelyo. Wala kini may ginapalingkawas. Nagadulot kini, hangtud bisan sa kabatan-ong kahimtang pa sa butang. Ginabunlot niini ang mga gamot, ang mga gamot sa kapaitan, ang—ang—ang mga gamot sa kawalay-pagpakabana, ang mga gamot nga iya sa kalibutan. Ipanglarot Mo kini, Gino, pinaagi sa Balaang Espiritu. Ipangsalibay Mo kini palayo gikan sa mga tawo.

²⁹⁵ Ginaangkon ko sila para sa Imo karong gabhiona, Jesus, ingon nga Imo mismong personal nga mga bahandi, ingon nga mga mutya sa Imong corona, ingon nga mga miyembro sa Imong Pangasaw-onon. Ginaangkon ko ang ilang mga kinabuhi.

Nagapangamuyo ako uban sa tibuok kong kasingkasing, kauban niining mga ministro, nga mga alagad sa buhing Dios. Nagapangamuyo ako nga tangtangan Mo gikan kanila, Ginoo, ang mga butang nga iya sa kalibutan, ug hatagan Mo sila og kaisog nga makaaslang sa atubangan ni Satanas. Itugot kini, Ginoo. Nagatoo kami nga Imong buhaton kini. Miingon Ka, “Mangayo kamo sa Amahan og bisan unsa man diha sa Akong Ngalan, pagabuhaton Ko kini.” Karon, wala Ka moingon, “Uh, buhaton Ko kini siguro.” Miingon Ka, “pagabuhaton Ko kini.” Ug nagatoo ako nga matuod kini.

²⁹⁶ Karon, nahisulat usab diha sa mga Kasulatan, “Sa Akong Ngalan magapagula sila og mga yawa.” Ang yawa kini ang nagpahinungdan sa usa ka batan-ong gining o babaye, nga dauton ang iyang kinabuhi. Ang yawa ang hinungdan para sa usa ka tawo nga dauton ang iyang kinabuhi. Ug gusto kong lakbitan kining usa ka gamay’ng estorya, Ginoo, diha sa akong pagpangamuyo. Ug nagaampo ako nga dunggon Mo ako, ug tubagon ang akong pag-ampo, nga ang matag usa sa mga niini maangkon Mo gayud karong gabhiona ingon nga mga mutya sa Gingharian. Nanggiduol sila. Ug magapanubag ako sa mga gisulti ko karong gabhiona. Ug ania sila nga nagaduol og nagatindog uban kanako, ug ginapuwesto ang among kaugalingon diha sa kiliran ni Cristo.

²⁹⁷ Karon, Satanas, nabuntog ka na. Napugngan mo ang pipila kanila, apan wala ka nagmadaugon sa away. Miingon si Jesus, “Siya nga nagaduol Kanako, dili Ko gayud igasalikway.”

²⁹⁸ Satanas, estoryahan ta ka, nga usa niana ka adlaw adunay usa ka batang lalaki nga nagabantay sa carnero sa iyang amahan. Ug miabot ang usa ka leon ug gisakmal ang usa sa mga carnero, gitangag kini palayo, madauton nga minaltrato kaayo, ug pagakaunon na unta kadto. Apan kining matuod nga batan-ong magbalantay, wala siya og unsa man nga hinagiban gawas lamang niadtong lamboyog, apan aduna kaniya ang pagtoo diha sa buhing Dios. Gigukod niya ang leon, ug nadakpan niya kadto, ug iyang—iyang gipatay kadto. Maisug niyang giatubang kadto, ug nadakop niya kadto sa balhibo niini ug gipatay kadto. Gikuha niya ang carnero gikan sa pagkasakmal, gidala kini pabalik sa pastuhan aron matambalan.

²⁹⁹ Gikuha mo kining mga bililhong carnero sa Dios, kining mga kababayan-an, nga nagpahinungdan kanila nga putlan nila ang ilang buhok ug magmeyk-ap, ug maghitsura nga sama sa mga butang nga ginakondena sa Biblia, ug nagdahum ka nga mamaimo sila. Apan ania ako uban niining yanong lamboyog sa pag-ampo. Ginadala ko sila pabalik karong gabhiona. Dili mo na sila mahawiran pa. Napildi ka na sa away. Kining bililhong mga kalalaken-ang nagatindog dinhi, nga mga carnero sa Dios, buhian mo sila. Ginamandoan ka namo, diha sa Ngalan ni Ginoong Jesus Cristo. Ginabutang ko sa taliwala niining mga

kinaiya ug kainit sa ulo, ug mga pagka-imoral ug unsa pa man kini, ginabutang ko ang Dugo ni Jesus Cristo, pinaagi og pagtoo, sa taliwala kanila ug nianang butang pag-usab. Dili mo na sila masakmal pa pag-usab. Anaa na sila sa pastuhan sa Amahan. Sila'y mga anak Niya. Lumayo ka kanila. Sa Ngalan ni Jesus Cristo, ginamandoan ta ka.

³⁰⁰ Wala ni usa ka yawa didto sa impiyerno ang makapanghilabot pa kaninyo, kung tohan lang ninyo kana. Natabonan na kamo sa Dugo. Napalibotan na kamo sa pag-ampo, sa mga ministro sa Ebanghelyo, ug sa mga mensahero sa pakigsaad, sa pag-ampo. Tanan kamong nagatindog dinhi, nagduol, nahibalo mo nga aduna mo'y mga dili-maayong kinaiya, mga kasaypanan, ug mga butang nga gikaulaw ninyo. Kung inyong ipahimutang kini karon diha sa tumbagang altar sa hukmanan sa Dios, ug dawaton kini karon ingon nga kapasayloan para kaninyo, nga ginahatag ni Cristo, mahimo ba ninyong buhaton kana nga paghalad nga inubanan og pagtoo, diha sa pagpataas sa inyong kamot ug ingnon, "Ginadawat ko na kini karon. Wala na kini kanako. Ug sugod niining adlaw, dili ko na kini buhaton pag-usab"? Naluwas na kamo pinaagi sa Dugo ni Jesus Cristo. Amen. Amen. Dalaygon ang Dios.

Aduna pa ba nga gustong moduol, moapil niining pundok?

³⁰¹ Aduna pa ba'y masakiton sulod sa bilding, nga gustong motindog aron maiampo mismo niining orasa? Pagtindog lang.

³⁰² Gusto kong ang matag usa kaninyo nga ania karon, kung dili pa kamo—kung dili pa kamo kabahin sa usa ka iglesiang nagatoo sa kinatibuk—ang Ebanghelyo, pagtambong kamo sa usa, kung dinhi puede man pud, kung nagpuyo kamo nga duol ra dinhi. Duola ang pastor ug magpabautismo. Ug dayon kung wala pa ninyo madawat ang Espiritu Santo, iampo sa Dios nga ihatag kaninyo ang Espiritu Santo ug pagapun-on kamo, himoon kamong kabahin na sa Pangasaw-onon.

³⁰³ Lantawa ninyo dinha, mga igsoon, ang adunay mga sakit. Dili na mahimong hawiran pa sa yawa kana nga mga tawo. Oras na kini nga pangbuhian na sila. Hallelujah! Wala ba ninyo kana ginatoohan? [Nagaingon ang kongregasyon, "Amen."—Ed.]

Iduko nato ang atong mga ulo alang sa pag-ampo.


³⁰⁴ Ug ang matag usa kaninyo nga mga anaa dinha, nga mga may sakit, kamong mga nagatindog, ipandong ninyo ang inyong mga kamot sa usa'g usa. Miingon si Jesus Cristo, "Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila." Pandongan ninyo og mga kamot ang usa'g usa. Karon, ayaw kamo pag-ampo nga alang sa inyong kaugalingon. Pag-ampo kamo alang sa inyong abay nga ginapandongan ninyo sa kamot, tungod kay sila usab nagaampo alang kaninyo.

Mag-ampo kita sa dungan karon ingon nga usa ka Iglesiang Cristohanon.

³⁰⁵ Ginoong Jesus, puno kami sa pagpasalamat tungod niining kadaugan karong gabhiona, mga kalag nga nagaduol nganha Kanimo. Karon, natangag sa yawa ang pipila sa Imong carnero, tungod sa mga balatian. Ania kami aron bawion sila. Ug ingon nga Iglesia sa buhing Dios, ginahinginlan namo ang yawa, ug nagaingon, “Buhian mo kining mga masakiton, Satanas. Ginamandoan ka namo diha sa Ngalan ni Jesus Cristo, nga mangaayo sila.” Miingon ang Biblia, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila.” Saad kana sa Dios, ug nahibalo kami nga matuod kini. Nangaayo sila pinaagi sa mga labod ni Ginoong Jesus Cristo.

³⁰⁶ Karon, kung nagatoo kamo niini, ipataas ninyo ang inyong mga kamot ug dayegon Siya. Amen.

³⁰⁷ Sige, pastor, sa imo na. Panalanginan ka sa Dios, igsoon. Maanindot nga makauban ka niining gabhiona. Ang Dios magauban kanimo.

Panalanginan kamo sa Dios, mga igsoon nga ania dinhi. 

ANG KASAL SA CORDERO CEB62-0121E
(The Marriage Of The Lamb)

Kining Mensahe ni Igsoong William Marrion Branham, unang giwali sa Ingles niadtong Dominggo sa gabii, Enero 21, 1962, didto sa Fellowship Tabernacle sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org